

YEMA CUÁŨ NÜXŨ DAUXŨ I

YIXCÜRA TÁ NGUPETÜXŨCHIGA

**Ore ga Cuáŭxŭ nüxŭ nacuxêxŭ ga
Ngechuchu ga Cristu**

1 ¹Ñã nixĩ i ngẽma ore ga Tupana Ngechuchu ya Cristuxŭ nüxŭ cuaxêxŭ na nüxĩ norũ duũxŭgũxŭ nüxŭ nacuxêxŭcax i ngẽma paxa tá ngupetũxŭ. Rũ nüma ga Ngechuchu ya Cristu nixĩ ga norũ orearũ ngerũ ga daxũcũãxŭ namuxŭ na norũ duũcũ ga Cuáŭmaã nüxŭ na yaxuxũcax. ²Rũ choma i Cuáŭ chixĩ ga aixcũma meãma nüxŭ chadauxŭ rũ chanaxũmatũxŭ ga guxũma ga yema Tupanaãrũ ore ga Ngechuchu chauxcax ngoxêxŭ. ³Rũ tataãe ya yixema duũxŭgũpexewa nawa ngũxe i ñã Tupanaãrũ ore, rũ ngẽxgumarũ ta tataãegũ ya yixema nüxŭ ñnũxê rũ naga ñnũxê i ñã ore i ũmatũxŭ, erũ paxa tá ningu i ngẽma nüxŭ yaxuxŭ.

**Cuáŭ nanaxũmatũ naxcax ga yema 7
tũcumũ ga yaxõgũxŭ ga Áchiaanewa
yexmagũxŭ**

⁴Rũ choma i Cuáŭ rũ chanaxũmatũ i ñã ore pexcax i yaxõgũxe ya yima 7 ya

ĩãne ya Áchiaarũ naãnewa ngẽxmagũnewa ngẽxmagũxe. Rũ chanaxwaxe i pexũ narũngũxêe rũ pexũ nataãêxêe ya yima Tupana ya woetama ngẽxmaêchacũ. Rũ ngẽxgumarũ ta chanaxwaxe i pexũ narũngũxêe rũ pexũ nataãêxêe i ngẽma Naãe i Üünexũ i naxũtawa ne ũxŭ i perũ dauruũ ixĩxŭ i pema i yaxõgũxe ya yima 7 ya ñãnewa na pengẽxmagũxŭ. ⁵Rũ ngẽxgumarũ ta chanaxwaxe na pexũ nangũxêxŭ rũ pexũ nataãêxêxŭ ya Ngechuchu ya Cristu ga aixcũma meãma nüxŭ ixucũ ga Tupanaãrũ ore ga ñoma ga naãnewa. Rũ nüma nixĩ ga nüxĩra yuwa ñnadaxŭ. Rũ nüma rũ guxũma i ñoma i naãnewa ngẽxmagũxŭ i nachiũãneãrũ ãẽxgacũgũarũ ãẽxgacũ nixĩ. Rũ nüma rũ tũxŭ nangechaũ, rũ nagũmaã tũxŭ inayanaxoxêe i tórũ pecadugũ. ⁶Rũ ñuxma na guxũãrũ ãẽxgacũ yĩxŭ i nümax, rũ tũxŭ naxũchica i ngextã nüma ãẽxgacũ íyĩxũwa. Rũ paigũxŭ tũxŭ nixĩgũxêe na Nanatũ ya Tupanaãxŭ ipuracũxũcax rũ nüxŭ icuaxũgũxũcax. Rũ name nixĩ i guxũgutãma Cristuxŭ ticuaxũgũ, erũ nüma rũ guxũgutãma

guxũārũ ãëxgacũ nixĩ. Rũ ngẽmaãcũ yĩĩ.
 7iRũ dücax, marũ ningaica na
 caixanexũgu íngaxũ ya Cristu! Rũ
 guxũtáma i duũxũgũ nüxũ nadau, rũ
 woo ga yema nacanapacũtũgũxũ rũ tá
 ta nüxũ nadaugũ. Rũ guxũ i duũxũgũ i
 guxũ i nachĩũãnecũãx i tama yaxõgũxũ
 rũ norũ muũmaã rũ norũ ngechaũmaã
 tá naxauxe i ngẽxguma íngaxũgu i
 nümax. Rũ aixcũma ngẽmaãcũ tá nixĩ.
 8Rũ nüma ya tórũ Cori ya Tupana ya
 guxũārũ ãëxgacũ ixĩcũ ya woetama
 ngẽxmaẽchacũ, rũ ñanagürũ:

“Chowa nixĩ ga inaxũgũxũ ga guxũma,
 rũ nataxuma i tacũ i chorũ yexera
 ngẽxmaẽchaxũ”, ñanagürũ.

Cuáũcax nangox ga Cristu ya mexẽchicũ

9Rũ choma i Cuáũ na pexcax
 chanaxũmatũxũ i ñãã popera, rũ peeneẽ
 chixĩ. Rũ ngẽma na Ngechuchuna na
 chaxũxũ rũ chaxãchica i ngextá nüma
 ãëxgacũ íyĩxũwa. Rũ Ngechuchucax
 pexrũũ ngũxũ chinge, natürũ nüma
 pexũ naporaexẽxürũũ choxũ naporaxẽẽ
 na yaxna namaã chaxĩnũxũcax i
 guxũma i ngẽma ngũxũ i choxũ
 üpetũxũ. Rũ choma rũ wũxi ga capaxũ
 ga Patmugu áëgaxũgu chapoxcu yerũ
 Tupanaãrũ orexũ chixuchigũ, rũ
 duũxũgũmaã nüxũ chixu ga yema nüxũ
 chacuãxũ ga Ngechuchu ya Cristuchiga.
 10-11Rũ wũxi ga yũxũarũ ngunexũgu rũ
 Tupanaãẽ i Üünexũ chomaã inacuãx, rũ
 changõxetũ rũ choweama nüxũ chaxĩnũ
 ga wũxi ga naga ga tagaxũ ga ñoma
 cornetagarũũ ixĩxũ ga ñaxũ choxũ:

“Chowa nixĩ ga inaxũgũxũ ga guxũma,
 rũ nataxuma i tacũ i chorũ yexera
 ngẽxmaẽchaxũ. Rũ ñuxma chanaxwãxe

na wũxi i poperagu cunaxũmatũxũ i
 ngẽma nüxũ cudauxũ. Rũ ñuxũchi
 chanaxwãxe i ngẽma yaxõgũxũ ya yima
 7 ya ñãne ya Áchiaarũ naãnewa
 ngẽxmagũnewa ngẽxmagũxũtanũwa
 cunamu. Rũ yima 7 ya ñãne nixĩ ya
 Epéchiu rũ Esmira rũ Pérgamu, rũ
 Tiatíra rũ Chardi rũ Firadérfia rũ
 Daodichéa”, ñanagürũ. 12Rũ chaugũ
 íchidau na nüxũ chacuãxũcax na tacũ
 yĩĩxũ ga yema chomaã idexaxũ. Rũ
 yexguma chaugũ íchidaũxgu rũ nüxũ
 chadau ga 7 ga weraarũ üruũgũ ga
 uirunaxcax ixĩgũxũ. 13Rũ yema 7 ga
 weraarũ üruũgũarũ ngãxũtanũwa nüxũ
 chadau ga wũxi ga duũxũ ga chauxcax
 nangechuchu ga duũxũxũ ixĩcũraũxũ.
 Rũ wũxi ga naxchiru ga máxũmaã
 naxãxchiru. Rũ wũxi ga goyexũ ga
 uirunaxcaxmaã nigoyeremũ. 14Rũ nayae
 rũ nachõxochi ñoma tacũ i
 chõxochixũrũũ. Rũ naxëtũ rũ ñoma
 üxüemarũũ niyauracũ. 15Rũ nacutũ rũ
 ta niyauracũ ñoma cobrexũchi i
 meãma ípixũrũũ. Rũ yexguma yadeaxgu
 rũ natagaxũchi ñoma taxũ i cotũna i
 chuchxũxũ ágaxũrũũ. 16Rũ norũ
 tũgünemexẽwa nüxũ nayexma ga 7 ga
 woramacurigũ. Rũ naãxwa nayexma ga
 wũxi ga tara ga guxũciwawa téxũ. Rũ
 nachiwe rũ ñoma üaxcũ poraãcũ
 nguxetũgurũũ nixĩ. 17Rũ yexguma nüxũ
 chadaũxgu, rũ napexegu chayangu
 ñoma chayuxũrũũ. Natürũ ga nüma rũ
 norũ tũgünemexẽmaã choxũ ningõgũ,
 rũ ñanagürũ choxũ:

“iTãxũ i cumuũxũ! Choma rũ chaxira
 chayexma rũ guxũgutáma
 changẽxmaẽcha. 18Rũ choma nixĩ ya
 yima maxũcũ. Rũ üpa rũ chayũ, natürũ i

ñuxma rü marü guxũgutamá
chamaxecha. Rü choxmexwa nangexma
na ñuxgu tá nayuxũ i wũxichigü i
duũxũ. Rü ngëxgumarũ ta choma nixĩ i
namaã ichacuáxũ i ngëma nachica i
ngextá ñangëxmagũxũwa i guxũma i
duũxũgü i yuexũ. ¹⁹Rü ñuxma rü
chanaxwaxe i cunaxümatü i ngëma
nũxũ cudaduxũ. Rü ngëma nixĩ i ñuxma
ngëma yaxõgũxũmaã ngupetũxũ, rü
ngëma yixcũra tá ngupetũxũ. ²⁰Rü
ñuxma rü tá cuxcax chanangoxẽẽ i
ngëma ẽxũguxũ i ngëma 7 i
woramacurigü i chorü tũgünemexẽwa
nũxũ cudaduxũchiga rü ngëma 7 i
weraarü üruũgü i uirunaxcaxchiga. Rü
ngëma 7 i woramacurigü i nũxũ
cudaduxũ, rü ngëma ãëxgacügü i ngëma
7 tũcumü i yaxõgũxũtũwa
ngëxmagũxũchiga nixĩ. Rü ngëma 7 i
weraarü üruũgü rü ngëma 7 tũcumü i
yaxõgũxũ i yima 7 ya ñanewa
ngëxmagũxũchiga nixĩ”.

**Ore ga yema 7 tũcumü ga yaxõgũxũcax
ümatũxũ Ore ga yema yaxõgũxũ ga
Epéchiuarü ñanewa yexmagũxũcax
ümatũxũ**

2 ¹“Rü ñuxma chanaxwaxe i ngëma
Epéchiuwa ngëxmagũxũ i
yaxõgũxũarü ãëxgacũcax cunaxümatü,
rü ñacurũgü nũxũ: ‘Ñaa nixĩ i norü ore
ya yima ngëma yaxõgũxũtanũgu
yarũxũũcũ rü norü tũgünemexẽmaã
nũxna daucü i ngëma yaxõgũxũarü
ãëxgacügü’. ²Rü ñanagürü i nũmax:
‘Choma nũxũ chacuax i guxũma i
ngëma cuxũxũ. Rü nũxũ chacuax na
ñuxãcü porãcü choxũ cupuracũxũ rü
ñuxãcü cunaxüamaxũ i ngëma puracü

woo ngëmacax muxũma i guxchaxũgü
cuxcax ñnguxgu. Rü nũxũ chacuax na
tama curü me yĩxũ i ngëma duũxũgü i
chixexũ ügũxũ. Rü ngëxgumarũ ta
nũxũ chacuax na meã cunangugũarü
maxũáxũ i ngëma duũxũgü i nũgü
ixugũxũ na Tupana imugũxũ yixĩgũxũ
natürü tama aixcũma ixĩgũxũ na
Tupana yamugũxũ. Rü cuma rü nũxũ
cucuaxama na idorataaxmaregũxũ
yixĩgũxũ. ³Rü woo naguxcha i ngëma
puracü i chauxcax cuxũxũ, natürü
cunaxüama. Rü woo chaugagu porãcü
ngũxũ na quingexũ, natürü yaxna
namaã cuxĩnũ, rü tama nũxũ curũchau.
⁴Natürü nangëxma i wũxi i cuxũxũ i
tama chorü me ixĩxũ. Rü ngëma nixĩ na
tama noxrirũ choxũ cungechaũxũ i
ñuxmax. ⁵Rü ngëmacax i ñuxma na
ngëma chixexũgu cunguxũ, rü name
nixĩ i nũxna cucuaxãchi na ñuxãcü
choxũ cungechaũxũ ga noxrix. Rü name
nixĩ i nũxũ curũxo i curü chixexũ rü
noxrirũ choxũ cungechaũãcũma mexũ
cuxũ. Natürü ngëxguma chi tama nũxũ
curũxoxgu i curü chixexũ, rü paxa tá
cuxũ íchayadau, rü tá cuxũ chaxo na
tama ngëma togü i yaxõgũxũtanũwa
cuxãchicaxũcax. ⁶Natürü nangëxma i
wũxi i cuxũxũ i chorü me ixĩxũ. Rü
ngëma nixĩ na naxchi cuxaixũ i ngëma
chixexũ i naxtũgũxũ i ngëma
Nicoraítægü. Rü choma rü ta naxchi
chaxai i ngëma chixexũ i naxtũgũxũ’.
⁷Rü yixema ãchixéxẽ rü name nixĩ i
naga taxĩnũ i ngëma Tupanaã i Üünexũ
nũxũ ixuxũ namaã i ngëma
yaxõgũxũtũcumũgü”. Rü ñanagürü:
“Yixema nũxũ rüporamaẽxẽ i chixexũ
rü tá tũxũ nũxũ chamuxnetaxẽẽ i norü o

i ngêma orix i tûxû maxêxêxû i
Tupanaârû orixnecûwa ngêxmaxû”,
ñanagûrû i Naãe i Üünexû.

**Ore ga yema yaxôgûxû ga Esmiraarû
îānewa yexmagûxûcax ûmatûxû**

⁸Rû yema chomaã idexaxû rû
ñanagûrû ta:

“Chanaxwaxe i Esmirawa
ngêxmagûxû i yaxôgûxûârû âêxgacûcax
cunaxûmatû, rû ñacurûgû tá: ‘Ñã nixî i
norû ore ya yima nûxîra yexmacû rû
guxûguma ngêxmaêchacû ga paxaãchi
yucû rû wena maxûcû’. ⁹Rû ñanagûrû i
nûmax:

‘Choma nûxû chacuax i guxûma i ngêma
cuxûxû. Rû nûxû chacuax na ñuxâcû
ngûxû quingexû. Rû nûxû chacuax na
cungearû diêruáxû i ñoma i naānewa,
natûrû daxûguxû i naānewa cuxû
nangêxma i ngêma taguma gûxû. Rû nûxû
chacuax na ñuxâcû chixri cuchiga
yadexagûxû i ngêma duûxûgû i nûgû
ixugûxû na Yudûgû yixûgûxû. Natûrû i
nûmagû rû aixcûma Chatanâârû
duûxûgûmare nixûgû. ¹⁰Rû tâxû i
cumuûxû naxcax i ngêma ngûxû i tá
quingexû! Rû ngoxo i Chataná rû tá norû
duûxûgûxû namu na poxcupataûgu pexû
napoxcuxêxûcax i ñuxre i pema na
ngêmaâcû pexû naxûxûcax. Rû ñuxre i
ngunexû tá ngûxû pingegû. Natûrû woo
ngêmaâcû ngûxû pingegûgu rû
chanaxwaxe i choxû cuyaxôoma
ñuxmatáta cuyux. Rû choma rû tá cuxna
chanaxâ i curû âmare i maxû i taguma
gûxû’. ¹¹Rû yîxema âchixêxê rû name nixî
i naga taxîñû i ngêma Tupanaãe i Üünexû
nûxû ixuxû namaã i ngêma
yaxôgûxûtûcumûgû”. Rû ñanagûrû:

“Yîxema ñoma i naānewa nûxû
rûporamaêxê i chixexû, rû tãûtâma
Tupana ngoxogûxû îpoxcuxêwâ tûxû
nawogû”, ñanagûrû i Naãe i Üünexû.

**Ore ga yema yaxôgûxû ga Pérgamuârû
îānewa yexmagûxûcax ûmatûxû**

¹²Rû yema chomaã idexaxû rû
ñanagûrû ta:

“Chanaxwaxe i Pérgamuwa
ngêxmagûxû i yaxôgûxûârû âêxgacûcax
cunaxûmatû, rû ñacurûgû tá: ‘Ñã nixî i
norû ore ya yima nûxû nangêxmacû i
ngêma tara i guxûcûwawa téxû’. ¹³Rû
ñanagûrû i nûmax:

‘Choma nûxû chacuax na yima îāne
ya Chataná poraãcû namaã ícuáxûnewa
na cumaxûxû. Natûrû woo ngêxma na
cuxâchiûxû, rû tama choxû ícutax. Rû
woo yexguma chorû orearû uruû ga
mecû ga Atípaxû yamaxûgûgu nagu ga
guma îāne ga nawa Chataná
duûxûgûmaã ícuáxûne, rû tama nûxû
curûxo na choxû cuyaxôomaxû.

¹⁴Natûrû nangêxma i ñuxre i tacû i
cuxûxû i tama chorû me ixûxû. Rû
ngêma nixî na cugûxûtawa
cunangêxmagûxêxêxû i ñuxre i curû
duûxûgû i tama nûxû rûxoechaûxû i
ngêma nguxêxetae ga nuxcûma Baráû
Yudûgûiarû âêxgacû ga Baráxû namaã
ucuxêxû na chixexûgu Yudûgûxû
nayixêxêxûcax. Rû yema Yudûgû rû
yema ucuxêgagu nawa naxî ga yema
petagû ga togû ügûxû naxcax ga norû
tupanetachicûnaxâgû. Rû
yexgumarûû ta yema ucuxêgagu nixî ga
naî ga ngemaã namaxêxû ga Yudûgû.
Rû ñuxma i ñuxre i curû duûxûgû i
Pérgamuwa ngêxmagûxû rû nagu naxî

ga yema nuxcūmaũxũ ga nguxēētae ga chixexũ, rü tama nüxũ narüxoechaũ.

¹⁵Rü ngēxgumarüũ ta ngēma cunangēxmagüxēē i ñuxre i duũxũgü i tama nüxũ rüxoechaũxũ i ngēma Nicoraítagarü nguxēētae i Baráũärü nguxēētaeruũ chixexũ. ¹⁶Rü ngēmacax chanaxwaxe i nüxũ curüxo i ngēma chixexũ. Rü ngēxguma chi tama nüxũ curüxoxgu, rü paxa tá ngēma cuxütawa chaxũ rü ngēma tara i chauaxwa ngēxmaxũmaã tá ngēma duũxũgüxũ chadai'. ¹⁷Rü yíxema āchixéxē rü name nixĩ i naga taxĩnũ i ngēma Tupanaāē i Üünexũ nüxũ ixuxũ namaã i ngēma yaxōgüxütücümügü". Rü ñanagürü:

“Yíxema nüxũ rüporamaēxē i chixexũ rü tá tüxna chanaxā i pāũ i daxũcũāx. Rü tá tüxna chanaxā ya wüxi ya nuta ya chócü i wüxi i naēga i ngexwacaxũxũ nagu ümatücü rü yíxema nayaxuxexicatama nüxũ cuáxũ”, ñanagürü i Naāē i Üünexũ.

**Ore ga yema yaxōgüxũ ga Tiatíraarü
íañewa yexmagüxũcax ümatüxũ**

¹⁸Rü yema chomaã idexaxũ rü ñanagürü ta:

“Chanaxwaxe i Tiatírawa ngēxmagüxũ i yaxōgüxũärü āēxgacüçax cunaxümatü, rü ñacurügü tá: ‘Ñaa nixĩ i norü ore ya yima Tupana Nane ya ñoma üxüemarüũ iyauraxetüciüci rü nacutügü rü ñoma cobre i meāma ípixürüũ ixixüne’. ¹⁹Rü ñanagürü i nümax:

‘Choma nüxũ chachuax i guxũma i ngēma mexũ i cuxüxũ. Rü nüxũ chachuax na ñuxācü cumücügüxũ cungechaũxũ, rü ñuxācü meāma choxũ na cuyaxōxũ,

rü ñuxācü nüxũ na curüngüxēēxũ i ngēma togü i yaxōgüxũ, rü ñuxācü yaxna namaã cuxĩnũxũ i guxchaxũgü. Rü nüxũ chachuax i ñuxma na noxriarü yexera cunaxüxũ i ngēma cuxũ chanaxwaxexũ. ²⁰Natürü nangēxma i wüxi i cuxüxũ i tama chorü me ixixũ. Rü ngēma nixĩ na ngēma cunangēxmaxēēēchaxũ i ngēma ngexũ i Yechabéra i nügü ixuxũ na Tupanaärü orearü uruũ na yíxũ, natürü norü nguxēētaemaã chorü duũxũgüxũ ngēma womüxēēxũ na chixri namaxēxũcax, rü naĩ i ngemaã inapegüxũcax, rü nangōxgüāxũcax i ngēma ñonagü i togü norü tupananetachicünaxāgüçax ñaixũ na ngēmamaã nüxũ yacuaxüũgüxũcax. ²¹Rü choma rü marü ngixũ íchananguxēē rü yaxna ngĩmaã chaxĩnũ na nüxũ naxoxũcax i ngēma ngĩcūma i chixexũ, natürü tama inaxwaxe na nüxũ naxoxũ rü ínataāxũ i ngēma ngĩrü chixexũ i naxüxũ. ²²Rü ñuxma i ngēma nge rü tá ngixũ chidaawexēē na ngĩrü ngürücarewa ngüxũ yangexũcax, rü ngēma duũxũgü i ngĩmaã ipexũ i ngēma nge rü nümagü rü tá ta ngüxũ na yangegüxũcax ega tama nüxũ naxoegu i ngēma chixexũ i ngĩmaã naxügüxũ. ²³Rü tá chanadai i ngixācügü i ngēma nge. Rü ngēmawa tá nüxũ nacuaxgü i guxũma i yaxōgüxũ na aixcūma nüxũ chachuáxũ i ngēma naāēwa nagu naxĩnũxũ i wüxichigü i duũxũ. Rü wüxichigü i pemax rü tá pexũ chanaxütanü ngēma na ñuxācü pemaxēxũācūma rü ñuxācü penaxüxũācūma. ²⁴⁻²⁵Natürü pemagü i Tiatíracũāx i tama nagu íxē i ngēma ngexũärü nguxēētae i chixexũ rü

taguma nawa ngúexe i ngêma ore i togü naxugügu rü Chatanáärü ore i êxügüxü ixíxü, rü pemaã nüxü chixu rü ngêma pexü chanaxwaxexü nixi na meã namaã penguxügüxü rü naga pexinüêxü i ngêma chorü ore ñuxmatáta íchangu i chomax. Rü ngêxícatama nixi i pexü chanaxwaxexü. ²⁶Rü yíxema nüxü rüporamaêgüxe i ngêma chixexü rü naxügüamaxê i ngêma tüxü chanaxwaxexü ñuxmatáta tayuemare, rü tá chaugüxütawa tüxü chaxüchica na wüxigu chomaã guxüärü âëxgacü tixügüxüçax. ²⁷Rü yema Chaunatü âëxgacüxü choxü na ixíxêxüürü tá tüxna chanaxã i pora na guxü i nachüüânegümaã taporaexüçax. Rü ngëxguma ñoma i naãnegüãx i duüxügü tama tümaga ínüëgu rü ñoma wüxi i tüxü ngíxü ipuxêëxüürü tá namaã tixígü rü poraãcü tá tanapoxcue. ²⁸Rü tá tüxna chanaxã ya yima woramacuri ya paxxama nüxü idaucü'. ²⁹Rü yíxema âchixéxê rü name nixi i naga taxínü i ngêma Tupanaãe i Üünexü nüxü ixuxü namaã i ngêma yaxögüxütücumügü" ñanagürü.

**Ore ga yema yaxögüxü ga Chardiariü
îānewa yexmagüxüçax ümatüxü**

3 ¹Rü yema chomaã idexaxü rü ñanagürü ta:

"Chanaxwaxe i Chardiwa ngëxmagüxü i yaxögüxüärü âëxgacüçax cunaxümatü, rü ñacurügü tá: 'Ñaa nixi i norü ore ya Tupana Nane ya Naãe i Üünexü nawa ngëxmacü ya yima 7 ya woramacuri nüxü ngëxmacü'. Rü ñanagürü i nümax: 'Choma nüxü chacuax i guxüma i ngêma cuxüxü. Rü nüxü chacuax ta rü woo guxüwama duüxügü nüxü

ixugügu na Tupanacax namaxêxü i ngêma yaxögüxü i cuxütawa ngëxmagüxü natürü tama aixcüma nixi i ngêma, erü ngêma yaxögüxü rü tama aixcüma choxü nayaxögü rü tama aixcüma chauxçax namaxê. ²Rü name nixi i cübaixächi rü cugü íquicuax rü cuyangüxêe i ngêma íraxü i mexü i cuxü íyaxüxü i marü iyarüxoxchaüxü. Erü nüxü chadau rü ngêma cuxüxü rü tama Tupanapexewa name. ³iRü nüxna nacuxächi ga yema ngüxêëtae ga mexü ga noxri nüxü cuxínüxü rü cuyaxuxü, rü nagu ixü! iRü nüxü rüxo i ngêma chixexü i cuxüxü! Natürü ngëxguma tama nüxü curüxoxgu i curü chixexü, rü ñoma wüxi i ngítaxáxü i ngürüächi ínguxürüü tá cuxütawa chaxü. Rü täütáma nüxü cucuax na ñuxguacü yíxü. ⁴Natürü ngêma Chardiwa cuxü nangëxma i ñuxre i duüxügü i mexü i tama ñoma i naãneärü chixexümaã nügü äüächiarü maxüãxgüxü. Rü nümagü rü tá cómüxümaã nixächirü rü ngêmaäcü tá chomaã inaxi, erü nümagü rü duüxügü i mexü i chauxçax maxêxü nixígü. ⁵Rü yíxema nüxü rüporamaêgüxe i chixexü, rü tá cómüxümaã tixächirü. Rü täütáma nawa tüxü íchapiéga i ngêma chorü popera i nagu chayawügüxü i ngêma duüxügü i nüxü nangëxmaxü i maxü i taguma gúxü. Rü Chaunatüpexewa rü guxüma i norü oreari ngeruügü i daxüçüãxgüpexewa tá tüxü chixu na chorü duüxügü tixígüxü'. ⁶Rü yíxema âchixéxê rü name nixi i naga taxínü i ngêma Tupanaãe i Üünexü nüxü ixuxü namaã i ngêma yaxögüxütücumügü".

**Ore ga yema yaxögüxü ga Firadérfiaariü
îānewa yexmagüxüçax ümatüxü**

⁷Rü yema chomaã idexaxü rü ñanagürü ta:

“Chanaxwaxe i Firedérfiawa ngëxmagüxü i yaxögüxüärü äëxgacüçax cunaxümatü rü ñacurügü tá: ‘Ñaa nixi i norü ore ya yima Üünecü ya aixcüma Cristu ixicü ya Dabíruü äëxgacü ya tacü ixicü ya nüxü nangëxmacü i pora na yawäxnaäxüçax rü nawäxtaäxüçax i daxüguxü i naäne. Rü ngëxguma texéçax yawäxnaägu, rü taxucüriwama texé tümachaxwa tanawäxta. Rü ngëxguma texéçaxwa nawäxtaägu, rü taxucüriwa texé tümacax tayawäxna’.

⁸Rü ñanagürü i nümax:

‘Choma nüxü chacuax i guxüma i ngëma cuxüxü. Rü dücax, cuxü chanatauxchaxëë na togümaä nüxü quixuxüçax i chorü ore, rü taxucüriwa texé cuxna tanachuxu na cunaxüxüçax i ngëma puracü. Rü choma nüxü chacuax na tama aixcüma cuporaxüchixü, erü noxretama nixi i ngëma yaxögüxü i cuxütawa ngëxmagüxü. Natürü cuma rü naga cuxinü i chorü ore, rü tama icuyacux na chorü duüxü quiixü. ⁹Rü ngëmacax i ngëma duüxügü i Chatanáaru ixigüxü i nügü ixugüxü na chorü duüxügü yixigüxü natürü tama aixcüma choxü ixigüxü, rü tá chanamu na cupexegu nacaxápüxügüxüçax na nüxü nacuxgüxüçax na aixcüma cuxü changechaüxü. ¹⁰Cuma rü meäma cuyanguxëë i ngëma cuxü chamuxü na aixcüma cuyaxöomaxü naétüwa i ngëma guxchaxügü i cuxü ngupetüxü. Rü ngëmacax tá cuxü ichapoxü na tama cuxna nanguxüçax i ngëma guxchaxü i taxü i ñoma i naänewa tá ínguxü na guxüma i ñoma i naäneçüäx i duüxügüxü naxüxüçax. ¹¹Rü paxa tá ngëma cuxütawa chaxü. Rü chanaxwaxe

i ñuxma meä cumaxüxüürü meä cumaxecha, na taxüema cuxna napuxüçax i ngëma curü ämare. ¹²Rü yixema nüxü rüporamaëgüxe i guxüma i chixexü, rü Chaunatu ya Tupanaxütawa tá tüxü changëxmagüxëë na tagutäma ngëma ítachoxüxüçax. Rü tümagu tá chanaxümatü i naéga ya Chaunatu ya Tupana. Rü ngëxgumarüü tá ta tümagu chanaxümatü i naéga ya Tupanaärü iäne ya Yerucharéü ya ngexwacaxüne ya Tupanaxütawa i daxüguxü i naänewa íruxixüne. Rü ngëxgumarüü tá ta tümagu chanaxümatü i chauéga i ngexwacaxüxü’. ¹³Rü yixema ächixéxë rü name nixi i naga taxinü i ngëma Tupanaäë i Üünexü nüxü ixuxü namaä i ngëma yaxögüxütücumügü”.

Ore ga yema yaxögüxü ga Daodichéawa yexmagüxüçax ümatüxü

¹⁴Rü yema chomaä idexaxü rü ñanagürü ta:

“Chanaxwaxe i Daodichéawa ngëxmagüxü i yaxögüxüärü äëxgacüçax cunaxümatü rü ñacurügü tá: ‘Ñaa nixi i norü ore ya yima aixcüma ixicü ya aixcüma yanguxëëcü i ngëma nüxü yaxuxü rü ore i aixcüma ixixüxüxicatama ixucü. Rü nüma nixi ga inaxügüäxü ga guxüma ga yema Tupana üxü’. ¹⁵Rü ñanagürü i nümax:

‘Choma nüxü chacuax i guxüma i ngëma cuxüxü. Rü nüxü chacuax na tama wüxi i duüxü i chauxchi aixü quiixü, natürü tama wüxi i duüxü i aixcüma choxü ngechaüxü quixi. Rü chierü noxtacüma wüxi i duüxü i chauxchi aixü quixigu rü exna noxtacüma wüxi i duüxü i aixcüma

choxũ ngechaũxũ quixĩgu. ¹⁶Natĩrũ ñuxma na írarũwatama choxũ cungechaũxũ, rũ ngẽmacax tá cuxũ íchatax. Erũ tama noxtacũma wũxi i duũxũ i chauxchi aixĩ quixĩ rũ tama noxtacũma wũxi i duũxũ i aixcũma choxũ ngechaũxũ quixĩ. ¹⁷Rũ cuma cugũ quixuxgu rũ cumuãrũ dĩẽruãx, rũ cumuãrũ ngẽmaxũãx, rũ meãma cuxũ naxũpetũ, rũ taxuũma cuxũ nataxu. Natĩrũ i cuma rũ tama nũxna cucuãxãchi na chopexewa rũ wũxi i taxuwama mexũ quĩxũ, rũ wũxi i ngechaũxũchi quĩxũ, rũ wũxi i taxuũma cuxũ ngẽmaxẽ quĩxũ, rũ ñoma wũxi i ngexetũxũrũ quĩxũ, rũ ñoma wũxi i ngexchiruxũrũ quĩxũ. ¹⁸Rũ ñuxma rũ cuxũ chaxucuxẽ na chauxũtawa naxcax cutaxexũcax i uiru i marũ üxũwa iguxũ i nũxĩcatama ixĩxũ. Rũ ngẽmaãcũ tá aixcũma cuxũ nangẽxma i curũ ngẽmaxũ. Rũ ngẽxgumarũ ta cuxũ chaxucuxẽ na chauxũtawa naxcax cutaxexũcax i cuxchiru i cómuxũ na ngẽmagu quicũxũcax na taxũema cuxũ dauxũcax na cungechiruxũ. Rũ ngẽxgumarũ ta cuxũ chaxucuxẽ na chauxũtawa naxcax cutaxexũcax i curũ maĩxẽtũxũ na curũmexẽtũxũcax na wena quidauchixũcax. ¹⁹Choma rũ tũxũ chaxucuxẽ rũ tũxũ ichayarũwẽxãchixẽẽ ya guxãma ya yĩxema tũxũ changechaũxẽ. Rũ ngẽmacax name nixĩ i nũxũ curũxo i cucũma i chixexũ, rũ aixcũma choxũ cungechaũ rũ cunaxũ i ngẽma cuxũ chanaxwaxexũ. ²⁰Rũ dũcax, choma rũ ãxwa changẽxmaẽcha. Rũ ngẽma Tu tu tu ñacharũgũeche. Rũ ngẽxguma texẽ choxũ ñũgu rũ chauxcax tayawãxnagu, rũ tá

tũmaxũtagu chaxũcu. Rũ tũmamaã tá chachibũ rũ tũma i chomaã. ²¹Rũ yĩxema nũxũ rũporamaẽgũxe i chixexũ, rũ tá chaugũxũtawa tũxũ charũtogũxẽẽ na chomaã ãẽxgacũ tixĩgũxũcax, yexgumarũ ga choma rũ nũxũ na charũporamaẽxũ ga chixexũ, rũ ñuxũchi Chaunatũxũtawa na chayarũtoxũrũ na namaã ãẽxgacũ chiĩxũcax. ²²Rũ yĩxema ãchixẽxẽ rũ name nixĩ i naga taxĩnũ i ngẽma Tupanaãẽ i Üünexũ nũxũ ixuxũ namaã i ngẽma yaxõgũxũtũcumũgũ”, ñanagũrũ ga yema chomaã idexaxũ.

Tupanaxũ nataxẽẽgũ i daxũguxũ i naãnewa

4 ¹Rũ yemawena ga choma ga Cuáũ rũ nũxũ chadau ga wũxi ga ãx ga iwãxnaxũ ga daxũguxũ ga naãnewa. Rũ yema naga ga nacornetagaraũxũ ga noxri nũxũ chaxĩnũxũ ga chomaã idexaxũ, rũ ñanagũrũ choxũ:

“iNuxã naxĩnagũ! Rũ tá cuxũ nũxũ chadauxẽẽ i ngẽma ñuxmaũcũwena tá ngupetũxũ”, ñanagũrũ. ²Rũ yexgumatama ga choma rũ Tupanaãẽ i Üünexũ rũ chauãẽmaã inacux, rũ daxũwa nanaga. Rũ yẽma daxũguxũ ga naãnewa nũxũ chadau ga wũxi ga tochicaxũ ga mexẽchixũ ga yẽma Tupana nawa rũtoxũ. ³Rũ guma yema tochicaxũwa rũtocũ, rũ ñoma nuta ya mexẽchicũ ya yasperiũ nixĩ na namexũ rũ ñoma nuta ya cornalĩnarũ nixĩ na namexũ. Rũ yema tochicaxũẽtũwa nayexma ga wũxi ga chirapa ga ñoma nuta ga esmerádarũ mexẽchicũ. ⁴Rũ yema tochicaxũcũwawa nayexmagũ ga 24 ga togũ ga tochicaxũgũ ga nũxũ ñnumaẽguãchixũ. Rũ yema

tochicaxũgũwa narũtogũ ga 24 ga ãẽxgacũgũ ga yaxõgũxũãrũ ixĩgũxũ. Rũ cõmũxũmaã nixãxchĩrũ rũ uirunaxcax nixĩ ga norũ ngaxcuerũgũ. ⁵Rũ yema nachica ga Tupana írũtoxũwa ínaxũxũ ga bajxbexanexũ rũ duruanexũ rũ nagagũ. Rũ yema tochicaxũpexewa nayexma ga 7 ga omũgũ ga yẽma naĩgũxũ. Rũ yema omũgũ nixĩ ga Tupanaãẽ i Üünexũ ga yema 7 ga yaxõgũxũtũcumũmaã icuáxũ. ⁶Rũ yema Tupanaãrũ tochicaxũpexewa rũ ñoma dexaétũwarũ ixĩxũmaã nachaxu rũ nichipetũ woruarũ. Rũ yema tochicaxũxũ ínachomaẽguãchi ga ãgũmũcũ ga daxũcũãx ga maxẽxũ ga guxũwama ãxetũxũ naweama rũ napexewa. ⁷Rũ wũxi ga yema daxũcũãx ga maxẽxũ rũ nanaxairaxũ. Rũ yema to rũ nanawocaraxũ. Rũ yema norũ tomaẽxpũx rũ nanaduũxũchiweraxũ. Rũ yema norũ ãgũmũcũ rũ nanaxĩyũ i gonagũxũraxũ. ⁸Rũ yema ãgũmũcũ ga daxũcũãx ga maxẽxũ, rũ wũxichigũ nũxũ nayexma ga 6 ga naxpexatũgũ. Rũ guxũwama ga naxpexatũtũwa rũ naxpexatũtũũwa rũ namuxetũ. Rũ ngunecũ rũ chũtacũ rũ ñanagũrũgũecha:

“Naxũũne, naxũũne, naxũũne nixĩ ya tórũ Cori ya Tupana ya guxũtũwa ngẽxmacũ rũ woetama ngẽxmaẽchacũ”, ñanagũrũgũecha. ⁹⁻¹⁰Rũ yema daxũcũãx ga maxẽxũ, rũ yexguma nũxũ yacuãxũũgũũxgu ga guma tochicaxũwa rũtocũ, rũ moxẽ nũxna naxãgũgu, rũ yema 24 ga ãẽxgacũgũ ga yaxõgũxũãrũ rũ yima woetama ngẽxmaẽchacũpexegu nacaxápũxũgũ, rũ nũxũ nicuãxũũgũ, rũ napexegu nananu ga norũ ngaxcuerũgũ. ¹¹Rũ ñanagũrũgũ:

“Pa Torũ Cori, Pa Torũ Tupanax, cuxũ nixĩ i namexũ na ticuãxũũgũxũ rũ cuxũ tataxẽẽgũxũ, erũ guxũtũtũwa cungẽxma. Yerũ cuma cunaxũ ga guxũma rũ curũ ngũchaũgagu nixĩ i nangõxũ i ñuxmax”, ñanagũrũgũ.

Popera ga idixixũchiga rũ Tupana Nane ga ñoma wũxi ga carnerurũ imácũchiga

5 ¹Rũ ñuxũchi nũxũ chadau ga guma tochicaxũwa rũtocũ, rũ norũ tũgũnemexẽwa nanange ga wũxi ga popera ga idixixũ. Rũ dũxetũwa rũ aixepewa rũ naxãmatũ ga yema popera. Rũ 7 wa ñĩnaxtachipexe. ²Rũ nũxũ chadau ga wũxi ga norũ orearũ ngerũ ga daxũcũãx ga poraxũchixũ ga tagaãcũ ícaxũ rũ ñaxũ:

“¿Texẽ tixĩ ya yĩxema mexe na tayagautanũxũ i norũ ñaxtachipexexũ rũ ítayadixgũxũ i ñaã popera?” ñaxũ.

³Natũrũ woo ga daxũgũxũ ga naãnewa rũ bai ga ñoma ga naãnewa rũ bai ga yuexũtanũwa, rũ tataxuma ga texẽ ga mexe na ítayadixgũxũ rũ nũxũ tadaumatũxũ na ñuxũ ñaxũ ga yema popera. ⁴Rũ choma rũ poraãcũ chaxaxu yerũ tataxuma ga texẽ ga mexẽ na ítayadixgũxũ rũ nũxũ tadaumatũxũ na ñuxũ ñaxũ ga yema popera. ⁵Rũ ñuxũchi wũxi ga yema 24 ga ãẽxgacũgũ ga yaxõgũxũãrũ, rũ ñanagũrũ choxũ:

“iTãxũ i cuxaxuxũ! Erũ yima Cristu ya Poracũ ya Yudátaa ixĩcũ ya ãẽxgacũ ya Dabítaa ixĩcũ, rũ marũ nũxũ narũyexera i guxũma i chixexũ. Rũ ngẽmacax nũma nixĩ i namexũ na yagautanũãxũcax i ngẽma 7 i norũ ñaxtachipexexũ i ngẽma popera rũ na íyawẽgũãxũcax”. ⁶Rũ ñuxũchi nũxũ chadau ga Tupana Nane

ga ñoma wüxi ga carneruxacü ga
 m̃axwa írudaxürüü yexma chicü
 naxütägu ga guma tochicaxüwa rütocü
 rü natanügu ga yema ägümücü ga
 daxücüäx ga maxëxü rü yema 24 ga
 äëxgacügü. Rü nüxü nayexma ga 7 ga
 nachatacuxre ga norü poraarü cuaxruü
 rü 7 ga naxëtü. Rü guma 7 ga naxëtü rü
 ngëma nixi i Tupanaäë i Üünexü i
 guxüma i ñoma i nañnewa namuxüärü
 cuaxruü ixixü. 7Rü guma pecaduarü
 ütanücax yucü rü guma tochicaxüwa
 rütocücax nixü, rü nanayaxu ga yema
 popera ga norü tügünemëxëwa
 yexmaxü. 8Rü yexguma nayauxägu ga
 yema popera, rü yema ägümücü ga
 daxücüäx ga maxëxü rü yema 24 ga
 äëxgacügü rü inacaxgüápüxü napëxegu
 ga guma pecaduarü ütanücax yucü. Rü
 wüxichigü ga yema äëxgacügü rü nüxü
 nayexma ga wüxi ga norü paxetarüü ga
 arpa. Rü yexgumarüü ta nüxü nayexma
 ga tazagü ga nangaxwegüraüxü ga
 uirunaxcax ga pumaratëxemaä
 ixääcuxü. Rü yema pumaratëxe rü
 nayixichi ga yexguma yaxaxgu. Rü
 yema pumaragü, rü ngëma nixi i
 Tupanaärü duüxügüarü yumüxëgüarü
 cuaxruügü. 9Rü nagu nawiyaegü ga
 wüxi ga wiyae ga yexwacaxüxü ga
 ñaxü:

“Cuma nixi i cumëxü na
 cunayaxuxü i ngëma popera rü
 cuyagautanüxü i ngëma norü
 ñachtapëxëxü. Yerü cuma rü
 marü quimäxchirex, rü
 cugümaä Tupanaäxü naxcax
 cutaxe i nagüxüraüxü i
 duüxügü i nagüxüraüxü i
 nachüüänecüäx i nagüxüraüxü i

nagawa idëxagüxü. 10Rü
 ngëmagüxü cuxüchica i ngextä
 äëxgacü íquiixüwa, rü
 Tupanaärü ngüxëëruügüxü
 cuyaxigüxëë na cumaä wüxigu
 guxü i nañnemaä
 inacuaxgüxücax”,

ñanagürügü. 11Rü yemawena
 ichadawenü, rü nüxü chaxinü ga naga
 ga muxüchixüma ga Tupanaärü orearü
 ngerüügü ga daxücüäx. Rü norü
 ngäxüwa nayexma ga yema tochicaxü
 rü yema ägümücü ga daxücüäx ga
 maxëxü rü yema 24 ga äëxgacügü. Rü
 namuxüchima ga yema Tupanaärü
 orearü ngerüügü ga daxücüäx ga yema
 yexmagüxü. 12Rü tagaäcü ñanagürügü:

“Daa nixi ya yima ñoma wüxi i
 carneruacürüü imäcü ga pecaduarü
 ütanücax yucü. Rü nüma nixi i namëxü na
 guxüärü äëxgacü yixü, rü guxüärü yora
 yixü, rü guxü i cuax nüxü ngëxmaxü, rü
 guxüärü yexera naporaxü. Rü nüma nixi i
 namëxü na guxäma nüxü ngechaügüxü rü
 nataxëëgüxü rü nüxü icuaxüügüxü”,
 ñanagürügü. 13Rü nüxü chaxinü ta ga naga
 ga guxüma ga yema Tupana üxü i
 daxügüxü i nañnewa rü ñoma i nañnewa
 rü nañnetüüwa rü taxtü i taxüwa
 ngëxmagüxü ga ñagüxü:

“Name nixi na guxügütäma guxäma nüxü
 icuaxüügüxü rü nüxü ngechaügüxü rü
 nataxëëgüxü ya yima pecaduarü ütanücax
 yucü rü yima ngëma tochicaxüwa rütocü,
 erü nümagü nixi i guxüguma äëxgacügü
 yixigüxü”, ñanagürügü. 14Rü yema ägümücü
 ga daxücüäx ga maxëxü rü ñanagürügü:

“Ngëmaäcü yi”, ñanagürügü. Rü
 yema 24 ga äëxgacügü rü
 inacaxgüápüxü rü nüxü nicuaxüügü.

Yema 7 ga ñaxtachipexeruüchiga

6 ¹Rü ñuxüchi nüxü chadau ga yexguma guma pecaduarü ütanüçax yucü yagauegu ga yema nüxiraüxü ga norü ñaxtachipexexü ga yema popera. Rü nüxü chaxinü ga wüxi ga yema daxüçüäx ga maxüxü ga tagaäcü ñoma duruanexürüü ñaxü choxü:

“iNuä naxü!” ñaxü. ²Rü ichadawenü rü nüxü chadau ga wüxi ga cowaru ga cómuxü. Rü yema naétüwa rütoxü rü nüxü nayexma ga wüxi ga norü würa. Rü wüxi ga ngaxcuerü nüxna naxä. Rü poraäëäcuma norü cowaumaä inaxüächi na duüxügüxü nayexeraxüçax. ³Rü yexguma guma pecaduarü ütanüçax yucü yagauegu ga yema norü taxre ga yema poperaarü ñaxtachipexexü, rü nüxü chaxinü ga yema norü taxre ga yema daxüçüäx ga maxüxü ga ñaxü choxü:

“iNuä naxü!” ñaxü. ⁴Rü yéma naxü ga wüxi ga cowaru ga dauxü. Rü yema naétüwa rütoxü rü wüxi ga tara ga taxü nüxna naxä. Rü yexgumarüü ta pora nayaxu na iyanaxoxëäxüçax na nügü nangechaügüxü ga duüxügü. Rü yemaäcü nanaxü na nügü naäaixüçax ga duüxügü. ⁵Rü yexguma guma pecaduarü ütanüçax yucü yagauegu ga yema norü tomaëxpüx ga yema poperaarü ñaxtachipexexü, rü nüxü chaxinü ga yema norü tomaëxpüx ga yema daxüçüäx ga maxüxü ga ñaxü choxü:

“iNuä naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naétüwa rütoxü rü

naxmexwa nüxü^ü nayexma ga wüxi ga täcüarü yaruü ga balanza. ⁶Rü nüxü chaxinü ga wüxi ga naga ga yema daxüçüäx ga maxëxüärü ngäxütanüwa inaxüxü ga ñaxü:

“Wüxi i ngunexüärü puracütanü rü naxätanü i wüxi i kilo i trigu. Rü wüxi i ngunexüärü puracütanü naxätanü i tomaëxpüx i kilo i chebada. iNatürü täxü i cuyanatauxëëxü i ngëma chixü rü yima binu!” ñanagürü. ⁷Rü yexguma guma pecaduarü ütanüçax yucü yagauegu ga yema norü ägümücü ga yema poperaarü ñaxtachipexexü, rü nüxü chaxinü ga yema norü ägümücü ga yema daxüçüäx ga maxëxü ga ñaxü choxü:

“iNuä naxü!” ñaxü. ⁸Rü ichadawenü rü nüxü chadau ga wüxi ga cowaru ga dexexü. Rü yema naétüwa rütoxü rü Yu nixi ga naéga. Rü yema naweama ne üxü, rü Yuxüchica nixi ga naéga. Rü yema taxre nanayauxgü ga pora na ñoma ga naänewa rü wüxi ga yema norü ägümücütücumü ga duüxügümaä inacuaxgüxüçax na daimaä rü taiyamaä rü daaweanemaä rü ngoxo idüraexümaä nayuxëäxüçax. ⁹Rü yexguma guma pecaduarü ütanüçax yucü yagauegu ga yema norü wüximeëxpüx ga yema poperaarü ñaxtachipexexü, rü nüxü chadau ga wüxi ga nachica ga ngextä Tupanacax naxünagü nawa yagugüxü na nüxna naxägüäxüçax. Rü yema nachicatüüwa nüxü chadau ga naäëgü ga yema duüxügü ga Tupanaärü orexü na yaxugüxüçax naäaixü. ¹⁰Rü yema naäëgü rü tagaäcü ñanagürügü:

“Pa Tori Cori ya Guxüétüwa Ngëxmacü rü Üinecü rü Ixaxcümacüx,

¿ñuxgura tá ta i nuxna cucaxũ rü cunapoxcuxũ i ngẽma duũxũgü i chixexũ ga toxũ ðaixũ?” ñanagürügü.

¹¹Rü ñuxüchi ga Tupana rü wüxichigü ga yema duũxũgüna nanaxã ga naxchiru ga máxũ rü cómuxũ. Rü yema duũxũgüãëgüxũ ñanagürü:

“iPaxaãchi iperüngüẽ ñuxmatáta yangu i peeneëgü i Cristuaxũ puracüexũ i pexrüũ tá ðaixũ!” ñanagürü. ¹²Rü yexguma guma pecaduarü ütanicax yucü yagayeyu ga yema norü 6 ga yema poperaarü ñaxtachipexexũ, rü nuxũ chadau ga poraãcü na naxiãxachianexũ. Rü üaxcü rü wüxi ga naxchiru ga waxcharaxürü nixĩ. Rü tauemacü rü guxũwama nagürüü naduema. ¹³Rü woramacurigü rü ëxtagü rü daxüwa narüyi rü ñoma ga naãnegu nayi. Rü ñoma orix i doxüxüma buanecü ya tacü rüyixëëxürü nixĩ. ¹⁴Rü guxüma i daxüwa nuxũ idauxũ rü inayarütaxu. Rü ñoma wüxi i popera i dixcumüächixũ rü iyarütaxuxürü nixĩ. Rü guxüma ga maxpünegü rü capaxügü rü nixigachi ga nachicawa. ¹⁵Rü ñoma ga naãnewa yexmagüxũ ga nachüüãnegüarü ãëxgacügü, rü maxpünemagu rü maxpüneärü nutataniügu nicuxgü. Rü wüxigu yexma namaã nicuxgü ga yema togü ga ãëxgacügü ga taxügü ga ñoma ga naãnemaã icuaxgüxũ, rü churaragüarü ãëxgacügü ga taxügü, rü yema duũxũgü ga muärü ðëruãxgüxũ, rü yema duũxũgü ga ñoma ga naãnewa poraexũ, rü guxüma ga duũxũgü ga coriãxgüxũ, rü guxüma ga duũxũgü ga ngearü coriãxgüxũ. ¹⁶Rü guxüma ga nümagü, rü guma maxpünexũ rü guma nutagüxũ ñanagürügü:

“iToétügu peyi na toxũ ipicuxgüxũcax naxchaxwa ya yima ngẽma tochicaxüwa

rütocü, rü naxchaxwa ya yima pecaduarü ütanicax yucü erü tama tanaxwaxe na toxũ napoxcuxẽ! ¹⁷Erü marü ñnangu i ngẽma ngunexũ i ãücümaxũ i nagu napoxcuxẽ i ngẽma duũxũgü i tama Tupanaärü ixigüxũ. ¿Rü texé tá namaã tabora i ngẽma?” ñanagürügü.

Yema Yudfugü ga nacatüwa cuaxruüãxgüxũchiga

7 ¹Rü yemawena rü nuxũ chadau ga ägümücü ga Tupanaärü orearü ngerüügü ga daxücüãx ga ñoma ga naãneärü ägümücüpexegu chigüxũ. Rü ñanapoxügü ga gucüma ga buanecügü na tama waixümuãneétügu naxüxüçax, rü tama taxũ i taxtüétügu naxüxüçax, bai i tacü rü naïétügu naxüxüçax. ²Rü yexgumarüü ta nuxũ chadau ga wüxi ga Tupanaärü orearü ngerüü ga daxücüãx ga üaxcü íyarügoxüwaama ne üxũ. Rü nuxũ nayexma ga Tupana ya Maxücüarü tacüarü üëgarü. Rü nüma rü tagaãcü nuxna nacagü ga yema togü ga ägümücü ga Tupanaärü orearü ngerüügü ga nayauxgüxũ ga pora na nachixexëëgüãxüçax ga guxüma ga waixümu rü guxüma ga taxũ ga taxtü. ³Rü ñanagürü nuxũ:

“iTäxü i yatacüma penachixexëëxũ i waixümu rü taxtü i taxũ rü naigü, ñuxmatáta nacatüwa tayaxüarü cuaxruüãxgü i ngẽma Tupanaärü duũxũgü ixigüxũ!” ñanagürü. ⁴Rü nuxũ chaxinü ga ñuxre na yixũ ga yema cuaxruüãxgüxũ. Rü guxüma ga Yudfugütanüwa rü 144,000 nixĩ. ⁵⁻⁸Rü yema cuaxruüãxgüxũ ga Yudfugü, rü ñaã nixĩ:

Yudátaagü - 12,000
 Rubéütaagü - 12,000
 Gadutaagü - 12,000
 Achetaagü - 12,000
 Netarítaagü - 12,000
 Manachétaagü - 12,000
 Chimeútaagü - 12,000
 Lebítaagü - 12,000
 Ichacátaagü - 12,000
 Chaburáütaagü - 12,000
 Yuchetaagü - 12,000
 Beyamátaagü - 12,000

⁹Rü yemawena ichadawenü, rü nüxü chadau ga muxüchixüma ga nagüxüraüxü ga duüxügü ga nagüxüraüxü ga nagawa idexagüxü ga guxüma ga nachüüānewa ne íxü. Rü yema tochicaxüpepegu rü guma pecaduarü ütanücax yucüpepegu nachigü. Rü yema na namuxüchixü rü taxucüriwa texé tayaxugü na nüxre yíxü. Rü naxchiru ga icómüxü rü imáxümaā nixāxchiru. Rü naxmexwa nanangegü ga wairaátügü. ¹⁰Rü guxüma ga nümagü rü tagaäcü ñanagürügü:

“Yima tórü Tupana ya tochicaxüwa rütocü rü yima pecaduarü ütanücax yucü nixí ya tüxü maxēēgücü”, ñanagürügü. ¹¹Rü guxüma ga Tupanaärü orearü ngeruügü ga daxücüāx rü nüxü ínachimāēguāchi ga yema tochicaxü rü yema 24 ga āēxgacügü rü yema āgümücü ga daxücüāx ga maxēxü. Rü yema tochicaxüpepegu nanangücuchitanü ga yema orearü ngeruügü, rü Tupanaxü nicuaxüügü. ¹²Rü ñanagürügü:

“Rü ngēmaäcü yíí. Rü nūma nixí i namexü na guxüguma guxāma nüxü icuaxüügüxü, rü nataxēēgüxü, rü moxē

nüxna ixāgüxü, rü nüxü ingechaügüxü, erü guxü i cuax nüxü nangēxma, rü guxüētüwa nangēxma, rü guxüārü yexera napora. Rü ngēmaäcü yíí”, ñanagürügü. ¹³Rü nüxüchi wüxi ga yema 24 ga āēxgacügü rü choxna naca, rü ñanagürü:

“¿Texégü tixígü ya yíxema cómüchirugüxe, rü ngextá ne taxí?” ñanagürü. ¹⁴Rü choma chanangāxü, rü ñacharügü:

“Pa Corix, cuma nixí i nüxü cucuáxü na texégü tixígüxü”, ñacharügü. Rü yexguma ga nūma rü ñanagürü:

“Yíxemagü tixígü ga nawa ngupetütanüxē ga yema ngüxü ga taxü rü marü tügü iyauxgüchiruxe nagüwa ga guma pecaduarü ütanücax yucü. Rü ngēmacax nixí i ticómüchiruxü. ¹⁵Rü ngēmacax nixí i Tupanaärü tochicaxüpepegu tangēxmagüechaxü rü ngunecü rü chütacü rü Tupana íngēxmaxüwa nüxü tapuracüxi. Rü nūmatama ya Tupana ya tochicaxüwa rütocü rü tüxna nadau. ¹⁶Rü marü tagutāma wenaxärü taiya tüxü nangux, rü tagutāma tiṭawae. Rü marü tagutāma üaxcü tüxü nigu, rü tagutāma üaxcüari naianexü tüxü nangux. ¹⁷Erü yima pecaduarü ütanücax yucü i ngēma tochicaxüxütawa ngēxmacü, rü tá aixcüma meā tüxna nadau ñoma carnerugüina idauxüriü. Rü nawa tá tüxü nagagü i ngēma dexáarü chuxchuxügü i maxēērü. Rü Tupana tá tüxü ínanapi i guxüma i tūmagüüxētü”, ñanagürü.

Yema norü 7 ga ñaxtachipeperuüchiga rü yema buetare ga uirunaxcaxchiga

8 ¹Rü yexguma guma pecaduarü ütanücax yucü yagauyegu ga yema norü 7 ga yema poperaarü

ñaxtachipexexũ, rü ngãxũ ga ngora nachipetüanemare ga daxũguxũ ga naãnewa. ²Rü ñuxũchi nüxũ chadau ga yema 7 ga Tupanaãrũ orearũ ngeruũgũ ga daxũcũãx ga yexma Tupanapexegu chigũxũ. Rü wüxichigũ nanayaxu ga norũ corneta ga nüxna naxãxũne. ³Rü yemawena ínangu ga wüxi ga to ga Tupanaãrũ orearũ ngeruũ ga daxũcũãx. Rü yéma nanange ga wüxi ga norũ buetare ga uirunaxcax ga pumaraarũ gutexeruũ. Rü yema uirunaxcax ga pumaraarũ gutexeruũtaxmüpexegu nachi. Rü nanayauxtexe ga taxũ ga pumara ga nüxna naxãxũ na yema tochicaxüpexewa yexmaxũ ga pumaraarũ gutexeruũtaxmüwa yaguãxũcax, na yemaãcü Tupanana naxãaxũcax ga yema pumaratexe na yema pumaraema rü wüxigu Tupanaãrũ duũxũgüarũ yumüxëmaã Tupanaxũtawana nanguxũcax. ⁴Rü yema pumaratexe ga yema orearũ ngeruũãxũ yexmaxũ rü daxũ naxũëma wüxigu namaã ga Tupanaãrũ duũxũgüarũ yumüxëgũ ñuxmata Tupanaxũtawana nangu. ⁵Rü ñuxũchi ga yema orearũ ngeruũ rü nanayaxu ga yema buetare ga pumaraarũ gutexeruũ. Rü yema pumaraarũ gutexeruũtaxmüwa nanayaxu ga ãwe ga naĩcü, rü gumamaã nanaxũãcu ga guma buetare. Rü ñuxũchi ñoma ga naãneéügu nanaña. Rü yexgumatama poraãcü naduruãchiane, rü poraãcü nicuxcuane rü nibaixbexane rü naxĩãxãchiane.

**Tupanaãrũ orearũ ngeruũgũ ga
daxũcũãxãrũ cornetachiga**

⁶Rü yexguma ga yema 7 ga Tupanaãrũ orearũ ngeruũgũ ga daxũcũãx ga icornetaãxũ, rü nügũ

ínamexëëgũ na nagu yacuegũxũcax. ⁷Rü wüxi ga yema Tupanaãrũ orearũ ngeruũ rü nüxĩra nayacue ga norũ corneta. Rü yexgumatama ñoma ga naãneéügu narũyi ga gáuxũ rü üxüema ga nagümaã ãëũxũ. Rü wüxi ga yema norũ tomaëxpüxarũ üye ga ñoma ga naãne rü nixa. Rü yexgumarũ ta wüxi ga yema norũ tomaëxpüxarũ üye ga naĩxnecü rü nixa. Rü guxũma ga natüane rü nixae. ⁸Rü yema norũ taxre ga Tupanaãrũ orearũ ngeruũ rü nayacue ga norũ corneta. Rü ñuxũchi wüxi ga tacü ga taxüchixũ ga namãxpüneraũxũ ga iyauraxũ, rü yexma taxtũ ga taxügu nanaña. Rü wüxi ga yema norũ tomaëxpüxarũ üye ga taxtũ rü nagũxũ nananguxuchi. ⁹Rü wüxi ga yema norũ tomaëxpüxarũ üyetücumü ga yema taxtüwa maxëxũ, rü nayue. Rü yexgumarũ ta wüxi ga yema norũ tomaëxpüxarũ üyetücumü ga wapurugü, rü inayi. ¹⁰Rü yema norũ tomaëxpüx ga Tupanaãrũ orearũ ngeruũ, rü nayacue ga norũ corneta. Rü ñuxũchi wüxi ga taxüchicü ga woramacuri ga taemaxũchicü rü daxüwa narüngu. Rü wüxi ga omü ga ixaxürũ nixĩ. Rü nagu nangu ga wüxi ga yema norũ tomaëxpüxarũ üye ga natügü rü natüxacügü. ¹¹Rü guma woramacuri rü Üxüxũ nixĩ ga naëga. Rü wüxi ga yema norũ tomaëxpüxarũ üye ga guxũma ga dexá rü naxüxchiü. Rü muxũma ga duũxũgü rü yema dexáwa nayue yerü naxüxchiü. ¹²Rü yema norũ ägümücü ga Tupanaãrũ orearũ ngeruũ rü nayacue ga norũ corneta. Rü wüxi ga yema norũ tomaëxpüxarũ üye ga üaxcü rü nixo. Rü yexgumarũ ta wüxi ga yema norũ

tomaëxpūxarū ūye ga tauemacū rū woramacurigū rū ēxtagū rū nixo. Rū yemaācū wūxi ga yema norū tomaëxpūxarū ūye ga guxūma ga yema rū naxēāne. Rū ga ngunecū rū āgūmūcū ga ngora naxēāne. Rū ga chūtacū rū āgūmūcū ga ngora nataxuma ga tauemacū rū bai ga woramacurigū rū bai ga ēxtagū. ¹³Rū yemawena ichadawenū rū nūxū chaxīnū ga wūxi ga īyū ga daxūgu īxexēūxū ga tagaācū űaxū:

“Nangechaūtūmūgū i ngēma duūxūgū i yea pecaduāxū i naānewa maxēxū i ngēxguma yacuegūāgu tá ya norū cornetagū i ngēma togū i tomaëxpūx i Tupanaārū orearū ngeruūgū”, űaxū.

9 ¹Rū yema norū wūximeëxpūx ga Tupanaārū orearū ngeruū, rū nayacue ga norū corneta. Rū nūxū chadau ga wūxi ga woramacuri ga daxūwa rūngucū ga űoma ga naānegu ngucū. Rū guma woramacuri nanayaxu ga yema āxmaxū ga taguma iyacuāxūārū chawī. ²Rū nayawāxna ga yema āxmaxū ga taguma iyacuāxū. Rū yēma inayagoema ga caxixū űoma wūxi i taxū i ūxearū caxixūrū. Rū yema caxixū rū nanaxēēmaxēē ga ūāxcū. ³Rū yema caxixūwa īnachoxū ga munūgū ga naāneētūgu yixū. Rū yema munūgū rū nanayauxgū ga pora ga nūxna naxāxū na űoma tuxchinawerū duūxūgūxū nachixūcax. ⁴Rū yema munūmaā nūxū nixu na tama natūanexū nachixexēēxūcax rū bai i tacū rū nanetūgū rū bai i tacū rū naīgū. Natūrū nanamu na nachixexēēgūāxūcax ga yema duūxūgū ga tama Tupanaārū

cuaxruū nacatūwa yexmaxū. ⁵Natūrū tama nanamu na yema duūxūgūxū nađaixūcax. Natūrū nanamu na ngūxū nūxū yangexēēmaregūxūcax ga wūximeëxpūx ga tauemacū. Rū yema ngūxū ga nūxū yangexēēgūxū, rū űoma tuxchinawe duūxūgūxū chixūrū nixī. ⁶Rū ngēma ngunexūgūgu rū duūxūgū tá naxcax nadaugū na nayuxē, natūrū tāūtāma nayue. Rū woo nanaxwaxegūxūchi na nayuxē, natūrū taxucūrwatāma nayue. ⁷Rū yema munūgū rū űoma cowaru i guerrawa īxūrū nixīgū. Rū naēruwa nūxū nayexma ga tacū ga űoma ngāxcuerū ga uirunaxcaxrū ixīgūxū. Rū nachiwe rū nanaduūxūchiweraxūgū. ⁸Rū nayaegū rū űoma ngeāxyaerū nixīgū. Rū napūtagū rū űoma aipūtagūrū nixīgū. ⁹Rū naxūnewa nūxū nayexma ga tacū ga wūxi ga fierunaxcax ga poxūruūrū ixīxū. Rū naxpexatūgūga rū űoma muxūchine ya autu ya guerrawa cowaru tūgūnegarū nixī. ¹⁰Rū nareexūgū rū űoma tuxchinawerū naxānegu. Rū yema naneguwa rū naxāguchata na wūximeëxpūx ga tauemacū duūxūgūxū ngūxū yangexēēgūxūcax. ¹¹Rū yema munūgiarū āēxgacū, rū yema āxmaxū ga taguma iyacuāxūārū dauruū nixī. Rū Yudfugūgawa ga yema munūgiarū āēxgacū, rū Abadōū nixī. Rū Griégugūgawa rū Apoliōū nixī. Rū ngēma rū: “Chixexēēruū”, űaxūchiga nixī. ¹²Rū yexma nayacuax ga yema nūxīraūxū ga chixexū ga taxū, natūrū īnayaxūama ga to ga taxre. ¹³Rū yema norū 6 ga Tupanaārū orearū ngeruū rū nayacue ga norū corneta. Rū nūxū

chaxínü ga wüxi ga naga ga yema
Tupanapexewa yexmaxü ga uirunaxcax
ga pumaraarü gutexeruütaxmüwa
inaxüxü. ¹⁴Rü yema naga rü nanamu ga
yema orearü ngeruü ga cornetaáxü, rü
ñanagürü nüxü:

“iYawëgüxü i ngëma ägümücü i
orearü ngeruüü i Chatanáârü ixīgüxü i
taxtü i Euférategu ngāxügüxü!”
ñanagürü. ¹⁵Rü yemaäcü niwëgüxü ga
yema ägümücü ga orearü ngeruüü na
nadaiāxüçax ga wüxi ga yema norü
tomaëxpüxarü üyetücumü ga duüxügü.
Yerü ga yema orearü ngeruüü rü
woetama yemaçax ínamemaregü na
yema ngora rü yema ngunexü rü guma
tauemacü rü guma taunecü nadaiāxüçax
ga yema duüxügü. ¹⁶Rü nüxü chaxínü
na ñuxre na yiixü ga yema orearü
ngeruügiarü churaragü ga cowaruétügu
ixü. Rü 200 miyónegü nixīgü. ¹⁷Rü
yemaäcü nixi ga nüxü chadauxü ga
yema cowarugü ga yexguma
changoxetügu. Rü yema churaragü ga
yema cowaruétügu ixü rü nüxü
nayexma ga norü ngāxcuxünexü ga
poxüruü ixixü ga ñoma üxüxetürüü
iyauraxü. Rü yema poxüruü rü
nixāmatü rü nidaumatü rü niyauxmatü
rü nidexmatü. Rü yema cowaruerugü rü
ñoma aierurüü nixīgü. Rü naāxgüwa
ínaxüxü ga üxiema rü caxixü rü azufre.
¹⁸Rü wüxi ga norü tomaëxpüxarü
üyetücumü ga duüxügü rü nayue namaā
ga yema tomaëxpüx ga chixexëeruü ga
üxiema rü caxixü rü azufre ga yema
cowarugüaxwa íchoxüxü. ¹⁹Yerü ga
yema cowarugü rü naāxwa rü
nareexüwa nixi ga nüxü nayexmaxü ga
norü pora na duüxügüxü nađaixüçax.

Yerü ga nareexügü rü ñoma äxtaperüü
nixīgü, rü yemamaā nanangōx ga
duüxügü rü ngúxü nüxü ningexëe rü
nanadai. ²⁰Natürü ga yema togü ga
duüxügü ga tama yema poxcuruügümaā
yuexü, rü tama nüxü narüxoe ga yema
chixexügü ga naxügüxü. Rü tama nüxü
narüxoe na nüxü yacuaxüügüxü ga
ngoxogü rü norü
tupanetachicünaxägü ga uirunaxcax
rü diërumünaxcax rü cobrenaxcax rü
nutagünaxcax rü nañaxcax. Rü
yemaäcü nüxü nicuaxüügüama ga yema
norü tupanetachicünaxägü ga ngearü
maxüáxü rü tama nüxü dauxü rü tama
nüxü ñnuxü rü tama ixüxü. ²¹Rü tama
nüxü narüxoe na namáëtagüxü, rü
yayuüexü, rü nangëäëgüxü rü
nangítaaxgüxü.

Orearü ngeruü ga nüxü yexmaxü ga popera ga idixixüchiga

10 ¹Rü nüxü chadau ga wüxi ga to
ga Tupanaârü orearü ngeruü ga
daxügüxü ga naānewa íruxixü. Rü wüxi
ga caixanexüârü ngāxüwa nayexma, rü
wüxi ga chirapa naëruétügu nabo. Rü
nachiwe rü ñoma üāxcürüü niyaauraciü.
Rü naparagü rü ta ñoma üxiemariüü
niyaauraciü. ²Rü naxmexwa nüxü
nayexma ga wüxi ga poperaxacü ga
fiwëgüxü. Rü norü tügünepara rü taxtü i
taxüétügu nachicutü. Rü norü
toxwepara rü waixümüānegu nachicutü.
³Rü ñuxüchi ga numa rü tagaäcü aita
naxü ñoma wüxi ya ai ya tagaäcü aita
ücüruü. Rü yexguma aita naxüxgu rü 7
expüxcüna naduruāchiane. ⁴Rü
yexguma yema 7 expüxcüna na
naduruāchianexüguwena rü

chanaxümatüchaü. Natürü nüxü
chaxĩnü ga wüxi ga naga ga daxüguxü
ga nañewa inaxüxü ga ñaxü choxü:

“iTäxü i cunangoxëxü i ngëma 7 i
duruanexü nüxü ixuxü! iRü ngexrüma
na cunaxümatüxü!” ñaxü choxü. ⁵Rü
ñuxüchi ga yema Tupanaärü orearü
ngerü ga nüxü chadauxü na taxtü ga
taxüétügu rü waixümüétügu
nachicutüxü, rü daxü naxunagü ga norü
tügünechacüü. ⁶Rü inaxuneta naégagu
ga Tupana ya yima guxüguma maxücü
ya yima naxücü i daxüguxü i naäne rü
ñoma i naäne rü taxtü i taxü rü guxüma
i ñacü nawa ngëxmagüxü. Rü ñanagürü
ga yema orearü ngerü:

“Ñuxma rü marü täütáma nuxcü
ningu i ngëma Tupana nüxü ixuxü. ⁷Erü
ngëxguma nawa nanguxgu na ngëma
norü 7 i Tupanaärü orearü ngerü
inaxügüxü na yacueäxü ya norü corneta,
rü ngëxguma tá nixü i yanguxü ga yema
noxri ëxügüxü ga Tupanaärü uneta,
yema nuxcümaügüxü ga norü orearü
uruügümaä nüxü yaxuxü”, ñanagürü.
⁸Rü yema naga ga noxri nüxü
chaxĩnüxü ga daxüguxü ga nañewa
inaxüxü, rü wenaxärü chomaä nidexa.
Rü ñanagürü choxü:

“iNaxütawa naxü i ngëma Tupanaärü
orearü ngerü i taxtü i taxüétügu rü
waixümüäneeétügu chicutüxü! iRü nüxna
nayaxu i ngëma poperaxacü i marü
fiwëgüxü i naxmëxwa ngëxmaxü!”
ñanagürü. ⁹Rü naxütawa chaxü ga yema
orearü ngerü, rü nüxna naxçax chaca ga
yema poperaxacü na choxna naxäxüçax.
Rü nüma rü ñanagürü choxü:

“Ñä nixü. iRü nayaxu rü nangöx! Rü
cuçaxwa rü berurerü tá namaçcura.

Natürü cuanüwa rü tá nanaxüächi”,
ñanagürü choxü. ¹⁰Rü yema orearü
ngerüümëxëwa chanayaxu ga yema
poperaxacü, rü chanangöx. Rü
chauçxwa rü berurerü namaçcura.
Natürü yexguma chanangöxguwena rü
chauanüwa rü nanaxüächi rü
changuxneca. ¹¹Rü ñuxüchi chomaä
nüxü nixu, rü ñanagürü choxü:

“Name nixü na wenaxärü Tupanaärü
orexü quixuxü namaä i muxüma i
nagüxüraüxü i duüxügü, rü muxüma i
nachiüäneçüäxgü i duüxügü, rü
muxüma i duüxügü i to i nagawa
idexagüxü, rü muxüma i
nachiüänegüarü äëxgacügü”, ñanagürü
choxü.

Taxre ga orearü uruüchiga

11 ¹Rü yemawena chanayaxu ga
wüxi ga dëxnenëxä ga
ngugürü ixüüne ga choxna naxäxüne. Rü
guma choxna naxacü rü ñanagürü choxü:

“iNachi rü nangugü ya yima
Tupanapata rü ngëma pumaraarü
gutëxerütaxmü! iRü yaxugü rü ñuxre
yüxü i ngëma duüxügü i ngëma Tupanaxü
icuaxüügüxü! ²iNatürü ngëma naäxtü ya
Tupanapata, rü täütáma cunangugü! Erü
ngëma duüxügü i tama Tupanaäxü
yaxögüxüna marü nanaxä. Rü nümagü rü
tomaëxpüç ya taunecüarü ngäxü tá
chixëxü namaä naxügü ya yima ñäne ya
üünene ya Yerucharëü. ³Rü choma rü tá
chanamu i taxre i chorü orearü uruügü na
1,260 i ngunexü duüxügümaä nüxü
yaxugüxüçax i chorü ore. Rü nümagü i
ngëma taxre rü tá niwëxchiru na ngëmawa
duüxügü nüxü cuçxgüxüçax na ngeçhaü
nüxü nguxgüxü”, ñanagürü choxü. ⁴Rü

ngēma taxre i orearū uruūgū nixī i norū cuaxruū i ngēma taxre i nanetū i orību rī ngēma taxre i weraarū ūruūgū i tōrū Cori ya ñoma i naāneārū yora ixīcūpexewa ngēxmagiūxū. ⁵Rū ngēxguma texē chixexū namaā ūgūchaūgu i ngēma taxre i orearū uruūgū, rī nūmagū rī ūxiema ya naāxwa īnacuxechinemaā tūxū tā īnagu. Rū ngēmaācū tā īnayanaxoxē i norū uwanūgū. Rū ngēmaācū tā tūxū nadai ya yīxema chixexū namaā ūgūchaūxē. ⁶Rū ngēma taxre i orearū uruūgū rī nūxū nangēxma i pora na īyachaxāchixūcax ya pucū na tama napuxūcax i guxūma i ngēma 1,260 i ngunexūgū i nagu Tupanaārū orexū yaxugūxū. Rū ngēxgumarūū ta nūxū nangēxma i pora na nagūxū yaxīxēēgūāxūcax i dexā. Rū ngēxgumarūū ta nūxū nangēxma i pora na ñoma i naānewa namugūāxūcax i nagūxūraūxū i poxcuruūgū na ngēmaācū ngūxū duūxūgūxū yangexēēgūxūcax i ngēxguma ngēma taxre naxwaxegūgu. ⁷Natūrū ngēxguma ngēma taxre i orearū uruūgū naguxēēgūgu na nūxū yaxugūxū i Tupanaārū ore, rī ngēma ngoxo i ngēma āxmaxū i taguma iyacuāxūwa īxūxūxū, rī tā nūxna nayuxu. Rū tā ngēma taxrexū narīyexera, rī tā nanadai. ⁸Rū ngēma naxūnegū i ngēma taxre rī tā yima īāne ga tōrū Cori nawa curuchawa ipotane ya Yerucharēūārū cayewa nawogū. Rū yima īāne rī nachixe rī ngēmacax Chodomaārū īānemaā rī Equituanemaā nanaxugū. ⁹Rū tomaēxpūx i ngunexūārū ngāxū rī muxūma i nagūxūraūxū i duūxūgū rī muxūma i guxū i nachīūānecūāx i duūxūgū rī muxūma i duūxūgū i to i nagawa idexagūchigūxū, rī tā nūxū nadaugū i naxūnegū. Rū tāūtāma

nanaxwaxegū na texē inataxgūxū. ¹⁰Rū ngēma duūxūgū i ñoma i naānewa maxēxū rī tā nataāēgū na marū nayuexū i ngēma taxre. Rū ngēma na poraācū nataāēgūxūchixū rī tā nūgūina āmare naxāgū, yerū yema taxre ga orearū uruūgū rī poraācū nanachixewe rī naāewa nananguxēēgū. ¹¹Natūrū yema tomaēxpūx ga ngunexūārū ngāxūguwena, rī Tupana wenaxārū nanamaxēxē ga yema taxre. Rū wenaxārū īnarūdagu. Rū guxūma ga yema duūxūgū ga nūxū daugūxū rī poraācūxūchi namuūē. ¹²Rū ñuxūchi ga yema taxre ga orearū uruūgū, rī nūxū naxīnūē ga wūxi ga naga ga tagaācū daxūguxū ga naānewa inaxūxū ga ñaxū:

“iNuā daxūwa pexī!” ñaxū. Rū ñuxūchi ga nūmagū rī wūxi ga caixanexūgu daxūguxū ga naānewa naxī. Rū norū uwanūgū rī yoxni nūxū narūdaunū. ¹³Rū yexgumatama poraācū naxīāxāchiane. Rū wūxi ga yema norū 10 arū ūye ga guma īāne, rī niwaxgū. Rū 7,000 ga duūxūgū nayue namaā ga yema īāxāchiane. Rū yema togū ga duūxūgū ga maxēxū rī poraācūxūchi namuūē. Rū Tupana ya daxūguxū i naānewa ngēxmacūxū nicuaxūūgū. ¹⁴Rū yexma nayacuax ga yema norū taxre ga chixexū. Natūrū paxa tā īnangu i ngēma norū tomaēxpūx ixīxū.

Guma norū 7 ga cornetachiga

¹⁵Rū yema norū 7 ga Tupanaārū orearū ngerūū, rī nayacue ga norū corneta. Rū nayexma ga nagagū ga tagaācū daxūguxū ga naānewa inaxūgūxū ga ñagūxū:

“Ñuxma rī yima mecū na namaā īnacuxgūxū i ñoma i naāne, rī nūma

nixĩ ya tórü Cori ya Tupana rü Nane ya Cristu. Rü nüma rü guxũgütáma namaã inacuaḡgũ”, ñagũxũ. ¹⁶Rü ñuxũchi ga yema 24 ga ãḡgacügũ ga norũ tochicaxũgũwa rütogũxũ ga Tupanapexewa, rü yexma nanangũcuchitanũ, rü Tupanaxũ nicuaḡxũgũ. ¹⁷Rü ñanagũrügũ:

“Pa Torü Cori ya Tupana ya Guxũärü Yexera Poracũx, cuma rü woetama cuyexmaẽcha, rü ñuxma rü ta cungẽxmaẽcha. Rü moxẽ cuxna taxãgũ, erũ marũ cugũmexẽwa cunangẽxmaxẽẽ i guxũma, rü marũ icunaxũgũ na namaã icucuáxũ. ¹⁸Rü ngẽma duũxũgũ i tama cuxrũ ixĩgũxũ rü poraãcũxũchi nanuẽ, natũrũ nawa nangu i ngẽma ngunexũ i nagu tá cunapoxcuxẽũ. Rü ngẽxgumarũũ ta marũ nawa nangu na nüxũ quicagũxũ i guxũma i duũxũgũ i yuexũ. Rü marũ nawa nangu na nüxũ cunaxũtanũxũ i ngẽma curũ duũxũgũ i curũ orearũ uruũgũ, rü ngẽma duũxũgũ i cupexewa imexũ, rü guxũma i ngẽma duũxũgũ i cuxũ muũẽxũ i yaexũ rü buexũ. Rü marũ nawa nangu na icuyanaxoxẽẽxũ i ngẽma duũxũgũ i nachixexẽẽxũ i ñoma i naãne”, ñanagũrtügũ. ¹⁹Rü ñuxũchi Tupanapata ga daxũgũxũ ga naãnewa yexmane, rü niwãxna. Rü yéma norũ aixepewa nüxũ chadau ga yema baũ ga Tupanaärü uneta ga nutagu ũmatixũ. Rü nibaĩxḡexane, rü poraãcũ nicucxwane, rü naxĩãxãchiane rü poraãcũ gáuxũ narũyi.

Wüxi ga nge rü wüxi ga dragóũ

12 ¹Rü ñuxũchi daxũwa nangox ga wüxi ga cuaḡxruũ ga taxũ. Rü iyexma ga wüxi ga nge ga ũaxcũrũũ iyaurchirucũcũ. Rü ngĩtũũcutiwa

nayexma ga tauemaciũ. Rü yema ngĩrũ ngaxcueruũ ga ngĩeruwa yexmaxũ, rü 12 ga woramacurigũ nixĩgũ. ²Rü yema nge rü itacharaũ. Rü poraãcũ aita ixũ yerũ ixĩraxaciũchaũ rü poraãcũ ingũxnecaxũchi. ³Rü ñuxũchi daxũwa nangox ga wüxi ga to ga cuaḡxruũ. Rü yéma nayexma ga wüxi ga nacoyaraũxũ ga dragóũ ga taxũchixũ ga dauxũ ga 7 ga naẽru nüxũ yexmaxũ rü 10 ga naxchatacuxre. Rü wüxichigũ ga naẽruwa rü nüxũ nayexma ga norũ ngaxcueruũ. ⁴Rü nareexũmaã inayatũchigũ ga wüxitũcumũ ga norũ tomaẽxpũxarũ üye ga woramacurigũ, rü ñoma ga naãneẽtũgu nanawogũ. Rü yema dragóũ rü ngĩpexegu nayachi ga yema nge ga íraxaciũchaũcũ, yerũ tũxũ nangóxchaũ ga guxema ngĩxãcũxe ga yexguma tabuxgu. ⁵Rü yema nge rü ixĩraxaciũ, rü nayatũ ga ngĩne. Rü nüma rü tá guxũ i nachĩũãneärũ ãḡgacũ nixĩ, rü tá namaã napora. Natũrũ ga guma ngĩne rü yema ngena nanayaxu ga Tupana, rü nügũxũtawana nanaga ga norũ tochicaxũpexewa. ⁶Rü yema nge rü wüxi ga nachica ga ngextã taxúema íxãpataxũwa iña. Rü yéma Tupana ngĩxcax nanamexẽẽ ga wüxi ga ngĩchica na yéma ngĩxna nadauxũcax rü ngĩxũ naxũwemũxũcax ga 1,260 ga ngunexũ. ⁷Rü yemawena ga daxũwa rü nügũ nadai. Rü Miguere ga Tupanaärü orearũ ngeruũgũarũ ãḡgacũ ixĩcũ rü guxũma ga natanũxũ ga orearũ ngeruũgũ, rü nügũ nadai namaã ga yema dragóũ ga taxũchixũ rü norũ orearũ ngeruũgũ. Rü yema dragóũ rü ñuxũchi norũ orearũ ngeruũgũ i chixexũ rü poraãcũ Tupanaärü orearũ ngeruũgũmaã nügũ

nadai. ⁸Natürü ga yema dragóũ rü norü orearü ngeruũgü rü tama Tupanaãrü orearü ngeruũgüxũ narüporamaëgü. Rü ñuxüchi ga yema dragóũ rü norü orearü ngeruũgü rü nangechica ga daxüguxũ ga naãnewa. ⁹Rü yemaãcü inataxüchi ga daxüguxũ ga naãnewa ga yema dragóũ ga yema nuxcûmaũxũ ga äxtape. Rü nüma rü ngoxogu rü Chatanágu naxáëga. Rü nüma nixĩ i guxũma i ñoma i naãnecũãx i duũxũguxũ nawomüxëxũ. Rü nüma rü norü orearü ngeruũgümaã ñoma ga naãnegu narüwoũ. ¹⁰Rü ñuxüchi nüxũ chaxĩnü ga wüxi ga naga ga daxüguxũ ga naãnewa tagaãcü ñaxũ:

“Ñuxma rü marü nawa nangu na tóriu Tupana rü norü duũxũguxũ namaxëxëxũ. Rü ñuxma rü nüma tüxũ nüxũ nadauxëë na guxũãrü yexera naporaxũ rü guxũãrü äëxgacü yĩxũ. Rü Nane ya Cristu rü marü tüxũ nüxũ nadauxëë na guxũmaã inacuaũ. Yerü marü daxüguxũ ga naãnewa inataxüchi ga Chataná ga ngunecü rü chütacü tóriu Tupanapëxewa taeneëgüxũ yeücürü ixuechaxũ. ¹¹Rü nümagü ga yema taeneëgü, rü marü Chatanáxũ narüyexeragü nagügagu ga guma pecaduarü ütanüçax yucü rü nagagu ga Tupanaãrü ore ga nüxũ yaxugüxũ. Yerü ga nümagü rü tama nayanuxügü ga norü maxũ, rü ínamemaregü na Tupanacax nayuxũ. ¹²iRü ngëmacax petaãëgü i guxâma i pema i daxüguxũ i naãnewa ngëxmagüixe! iNatürü pengechaütümüügü i pema i yea naãne i pecaduáxüwa ngëxmagüixe rü taxtü i taxüwa ngëxmagüixe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i

ngunexũ nüxũ ínayaxü na chixexũ naxüxũ, erü paxa tá napoxcu”, ñanagürü ga yema naga. ¹³Rü yema dragóũ ga taxüchixũ ga Chataná rü yexguma nüxũ yacuaxächigu na ñoma ga naãnegu natáexũ, rü ngíwe ningëchigü ga yema nge ga íraxacüci.

¹⁴Natürü ga Tupana rü yema ngena nanaxã ga taxre ga ngixpexatügü ga íyüpepatürüü íxixüne, na yema nachica ga ngextã taxüema íxãpataxüwa nañaxüçax naxchaxwa ga yema äxtape ga Chataná. Rü yema nachicawa nixĩ ga Tupana ngixna clauxũ, rü ngixü üwemüxũ ga tomaëxpüx ga taunecüarü ngãxũ. ¹⁵Rü yema äxtape ga Chataná rü dexã nügüaxwa ínayüxüxëë na wüxi ga natü naxüxüçax, rü yema natümaã ngixü yachaxëëxüçax ga yema nge. ¹⁶Natürü ga waixüümü rü ngixü narüngüxëë ga yema nge. Rü ningéane na iyachexëëxüçax ga yema dexã ga yema dragóũ nügüaxwa íxüxüxëëxũ. ¹⁷Rü ñuxüchi ga yema dragóũ ga Chataná, rü poraãcüxüchima ngímaã nanu ga yema nge. Rü ínixü na nügü namaã yaðaixüçax ga yema togü ga ngixácügü ga yema nge. Rü ngëma ngixácügü i ngëma dragóümaã nügü ðaixũ, rü ngëma nixĩ i ngëma duũxügü i meã Tupanaãrü orega ínüëxũ rü meã yaxögiuechaxũ i Ngechuchu ya Cristuarü ore i aixcûma íxixũ. Rü ñuxüchi ga yema dragóũ rü norü numaã taxtü ga taxüãnacügu nayariünu.

Taxre ga ngoxogüchiga

13 ¹Rü nüxũ chadau ga wüxi ga ngoxo ga taxü ga taxtügu íñuächixũ ga 7 eruxũ rü 10 chatacuxrexũ. Rü wüxichigü ga naxchatacuxrewa rü nüxũ nayexma ga norü ngaxcueruũ. Rü naërugügu

naxümatü ga ñuxre ga naégagü ga
 Tupanamaã guxchigagüxü. ²Rü yema
 ngoxo ga nüxü chadauxü, rü wüxi ga
 airüü nixi. Rü naxmexgü rü chatü ga
 taxümexégürüü nixi. Rü naãx rü wüxi
 ga aiaxrüü nixi. Rü yema dragóü ga
 Chataná rü yema ngoxoxü naporaxëe na
 naxrüü naporaxüçax rü naxrüü ãëxgacü
 yïxüçax na ñoma ga naänemaã
 inacáuüçax. ³Rü wüxi ga naëruwa ga
 yema ngoxo, rü nüxü nayexma ga wüxi
 ga taxü ga norü oxri ga namaã
 nayuxchaüxü. Natürü ga yema norü oxri
 rü nüxü nixë, rü naxçax nitaane. Rü
 guxüma ga ñoma ga naänecüãx ga
 duüxügü rü poraãcü yema ngoxomaã
 nañaixächie, rü nawe narüxi. ⁴Rü ga
 duüxügü rü yema dragóü ga Chatanáxü
 nicuaxüügü yerü yema ngoxoxü
 naporaxëe na ãëxgacü yïxüçax. Rü
 yexgumarüü ta yema ngoxoxü
 nicuaxüügü, rü ñanagürügü:

“¿Texé tangëxma ya ñaã ngoxorüü
 poraxe? ¿Rü texé tapora na namaã tügü
 taðaixü?” ñanagürügü. ⁵Natürü ga Tupana
 rü tama yema ngoxona nanachüxu na
 nügü yacuaxüüxüçax rü tacü Tupanamaã
 yaxugüxüçax rü ãëxgacü na yïxüçax ga ⁴²
 ga tauemacü. ⁶Rü yemaãcü chixexü naxü
 ga yema ngoxo. Rü poraãcü tacü
 Tupanamaã nixugü. Rü Tupanamaã
 naguxchiga, rü napatamaã rü ta
 naguxchiga, rü tümamaã naguxchiga ya
 guxäma ya yïxema daxügüxü i naänewa
 ngëxmagüxe. ⁷Rü yema dragóü ga
 Chataná rü yema ngoxoxü naporaxëe na
 Tupanaärü duüxügümaã nügü naðaixüçax
 ñuxmatáta tüxü nayexera. Rü ãëxgacüxü
 nayaxixëe na namaã inacáuüçax ga
 nagüxüraüxü ga duüxügü ga guxüma ga

nachiüãnecüãx ga nagüxüraüxü ga
 nagawa idexagüxü. ⁸Rü tá ngëma ngoxoxü
 nicuaxüügü i guxüma i duüxügü i ñoma i
 naänewa maxëxü i noxritama naäne üxgu
 ngeégagüxü nawa i norü popera ya yima
 pecaduarü ütanüçax yucü i nagu
 yawügüãxü i ngëma duüxügü i marü
 Tupana nüxna naxãxü i maxü i taguma
 gúxü. ⁹⁻¹⁰Rü ngëxguma texé äxchixëgu, rü
 name nixi i naga taxinü i ñaã tá pemaã
 nüxü chixuxü. Rü ngëxguma texé
 tümamaã naxuegugu na tüxü yayauxgüxü,
 rü noxtacüma tá tiyaxu. Rü ngëxguma texé
 tümamaã naxuegugu na tüxü yamaçgüxü,
 rü noxtacüma tá tüxü nimaxgü. Rü
 ngëmacax ya yïxema Tupanaärü duüxügü
 ixigüxe, rü woo tacü rü guxchaxü tüxü
 ngupetügu, rü tanaxwaxe na yaxna namaã
 taxinüëxü rü tayaxögüamaxü. ¹¹Rü
 yemawena nüxü chadau ga wüxi ga to ga
 ngoxo ga taxrechataçuxrexü ga
 waixümüãnewa íxüxüxü. Rü yema
 naxchataçuxre rü ñoma
 carneruchataçuxrerüü nixi. Natürü ga naga
 rü wüxi ga dragóü ga taxüchixügürüü nixi
 ga na natagaxü. ¹²Rü yexguma yema
 nüxüraüxü ga ngoxopexewa nayexmagu, rü
 naxrüütama napora. Rü ñoma ga
 naänemaã inacuaçax, rü nanamu ga ñoma ga
 naänewa maxëxü ga duüxügü na yema
 nüxüraüxü ga ngoxo ga ixëärü oxriáxüxü
 na yacuaxüügüxüçax. ¹³Rü yema ngoxo
 nanaxü ga taxü ga cuaxrüügü ga duüxügü
 tama nüxü cuáxü na naxügüãxü. Rü
 daxüwa nanayixëe ga üxü, rü ñoma ga
 naänegu nayi napexewa ga duüxügü.
¹⁴Natürü ga Tupana rü tama yema
 ngoxona nanachüxu na ñoma ga naänewa
 maxëxü ga duüxügüxü nawomüxëëxü
 namaã ga yema cuaxrüügü ga yema

nüxíraüxü ga ngoxopexewa naxüxü. Rü yemaäcü ga yema ngoxo rü duüxügüxü namu na naxügüäxüçax ga naxchicünaçax ga yema nüxíraüxü ga ngoxo ga taramaä chexexü rü poraäcü rüxóxü rü tama yuxü. ¹⁵Rü Tupana rü tama yema to ga ngoxona nanachuxu na namaxëëäxüçax ga yema nüxíraüxü ga ngoxochicünaçax. Rü yemaäcü ga yema ngoxo rü nanamaxëë ga yema naxchicünaçax na yadexaxüçax rü na nadaiäxüçax ga guxüma ga yema duüxügü ga tama nüxü icuäxüügüxü. ¹⁶Rü yexgumarüü ta guxüma ga duüxügüxü namu na norü tügünemexëwa rü exna nacatiüwa nüxü na nayexmaxüçax ga wüxi ga cuäxruü ga yema ngoxoéga ixíxü. Rü yemaäcü nanamu ga guxüma ga duüxügü rü woo buxü rü exna yaxü, rü woo duüxügü i muärü dïëruäxgüxü rü exna ngeärü dïëruäxgüxü, rü woo duüxügü i ngeärü coriäxgüxü rü exna duüxügü i ixäärü coriäxgüxü. ¹⁷Rü taxucüruwa texé tümaärü tacüçax tataxe rü exna tümaärü tacümaä tataxe ga yexguma tümaärü tügünemexëwa rü exna tümacatiüwa tüxü natauxgu ga yema ngoxoéga rü exna yema ngoxoégaarü cuäxruü ga número. ¹⁸Rü ñaä orexü na icuäxüçax, rü tanaxwaxe na tüxü nangëxmaxü i tóru cuäx. Rü yíxema tüxü nangëxmaxë i tümaärü cuäx, rü name nixi i tanangugü i ngëma número i ngëma ngoxoéga ixíxü. Erü ngëma número rü wüxi i yatüégachirex nixi. Rü ngëma número rü 666 nixi.

Yema 144,000 ga duüxügüarü wiyae

14 ¹Rü yemawena ichadawenü, rü nüxü chadau ga guma pecaduarü ütanüçax yucü ga guma maxpüne ga Sióügu äéganeéttügu chicü. Rü naxütawa

nayexma ga 144,000 ga duüxügü ga nacatiüwa ixäégaxü namaä ga guma pecaduarü ütanüçax yucüéga rü Nanatü ya Tupanaéga. ²Rü nüxüchi nüxü chaxínü ga wüxi ga naga ga tagaxü ga daxüguxü ga naänewa inaxüxü ga ñoma taxü i cotüna i chuchxügügarüü ixíxü rü ñoma poraäcü yaduruanexüüü ixíxü rü ñoma muxüchixü i duüxügü i arpawa ípaxetaxügüüü ixíxü. ³Rü yema 144,000 ga duüxügü rü nagu nawiyaegü ga wüxi ga yexwacaxüxü ga wiyae napexewa ga Tupanaärü tochicaxü rü napexewa ga yema ägümücü ga daxüçüäx ga maxëxü rü napexewa ga yema 24 ga äëxgacügü. Rü taxucüruwama texé ga togue nüxü tacuäxéga ga yema wiyae. Rü yema 144,000 ga duüxügüixicatama nixi ga nüxü cuäxgüxü. Rü yema nixi ga Tupana ñoma ga naänewa idexechixü na namaxëëëäxüçax. ⁴Rü yema nixi ga duüxügü ga tama ñoma ga naänearü ngüchaü i chixexümaä nügü äüächiarü maxüäxgüxü rü tama nüxü rüxoexü na Tupanaäxü yaxöguäxü. Rü nümagü rü yima Tupana Nane ga pecaduarü ütanüçax yucüwe narüxi i ngextä ínaxüxüwa. Rü yemagü nixi ga ñoma ga naänecüäxtaniüwa nüxira Tupana naxçax taxexü na noxrü rü Naneärü duüxügü i üünexü yixígüxüçax. ⁵Rü yematanüwa rü taguma texé nüxü taxínü na doraxü yaxügüxü, erü Tupanapexewa rü nataxuma i norü chixexü.

**Orearü ngeruügü ga
daxüçüäxärü orechiga**

⁶Rü nüxüchi nüxü chadau ga wüxi ga to ga orearü ngeruü ga daxüguxü ga naänegu íxexeüxü ga iyangexü ga Tupanaärü ore i guxügutáma ixíxü, na

guxũ i nachiũñanecũñaxgũmaã rü
nagũxũraũxũ i duũxũgũmaã rü guxũma
i duũxũgũ i nagũxũraũxũ i nagawa
idexagũxũmaã nüxũ yaxuxũcax. Rü
yemaãcü inayange ga yema Tupanaãrũ
ore na guxũma i ñoma i naãnewa
maxẽxũ i duũxũgũmaã nüxũ yaxuxũcax.
7Rü tagaãcü ñanagürũ:

“iNüxũ pemuũe ya Tupana rü nüxũ
picuaxũũgũ! Erũ marũ nawa nangu na
guxũma i duũxũgũna naçaxũ. iRü nüxũ
picuaxũũgũ ya yima naxüci i daxũguxũ
i naãne rü ñoma i naãne rü taxtũ i taxũ
rü guxũma i natũxacũgũ!” ñanagürũ.

8Rü yemawena nangox ga to ga orearũ
ngeruũ ga daxũcũñax, rü ñanagürũ:

“Marũ nagu nayarũchixe ya yima ñane
ya taxũne ya Babiróniã, rü nagu
napogüe rü nayawaxtaũgũxẽe ya norũ
ĩgũ. Yerũ yema ñanecũñax rü
nanachixexẽe ga guxũma ga to ga
nachiũñanecũñax ga duũxũgũ. Rü guxũma
ga yema duũxũgũxũ namu na
naxũgũãxũcax ga yema chixexũ ga
guma ñanewa naxũgũxũ ga
Tupanapexewa poraãcü chixexũ”,
ñanagürũ. 9-10Rü yemawena nangox ga
to ga orearũ ngeruũ ga tagaãcü ñaxũ:

“Ngẽxguma chi texé nüxũ icuaxũũgu i
ngẽma ngoxo rü naxchicũñaxãxũ
ticuaxũũgu rü tũgũ itaxãxgu na
tũmacatũwa rü exna tũmamexẽwa
ngẽma ngoxoégamaã tacuaxruũãxũ, rü
Tupana rü poraãcũxũchi tá tũxũ
napoxcu namaã i ngẽma poxcu i
guxũãrũ yexera ixĩxũ i nümatama ya
Tupana norũ numaã namexẽxũ. Rü
ũxũmaã rü azufre i iyauraxũmaã tá
ngũxũ tũxũ ningexẽ napexewa i norũ
orearũ ngeruũgũ rü napexewa ya yima

Nane ga pecaduarũ ũtanũcax yucũ. 11Rü
naẽma ya yima ũxũ ya nawa Tupana
ngũxũ tũxũ ingexẽẽne, rü guxũgutáma
ngẽma nicaixqueecha. Rü bai i írarũwa
tá tũxũ narũna i ngẽma ngũxũ ya
yĩxema ngẽma ngoxoxũ rü ngẽma
ngoxochicũñaxãxũ icuaxũũgũxe rü tũgũ
ixãxẽ na ngẽma ngoxoégamaã
taxãẽgaxũ. Rü bai i ngunecũ rü bai i
chũtacũ tá tũxũ narũna i ngẽma ngũxũ”,
ñanagürũ. 12Rü ngẽmacax ya yĩxema
Tupanaãrũ duũxũgũ ixĩgũxe rü norũ
orega ñnũxẽ rü Ngechuchuaxũ
yaxõgũxe, rü name nixĩ na yaxna namaã
taxĩnũxũ rü tayaxõgũamaxũ ega woo
tacũ rü guxchaxũ tũxũ ngupetũgu. 13Rü
ñuxũchi nüxũ chaxĩnũ ga wũxi ga naga
ga daxũguxũ ga naãnewa inaxũxũ ga
ñaxũ choxũ:

“iNaxũmatũ i ñãã ore i tá cumaã nüxũ
chixuxũ! Rü ñuxmaũcüũ tá tataãẽgũ ya
yĩxema tórũ Coriaxũ meã yaxõgũãcũma
yuexe. Erũ Tupanaãe i Üünexũ rü
ñanagürũ: ‘Ngũ, ngẽmaãcü tá tataãẽgũ
ya yĩxema, erũ tá itarũngũe nüxna i
tũmaãrũ puracũgũ. Rü ngẽma mexũ i
taxũgũxũ rü tũmamaã wũxigu daxũguxũ
i naãnewa tá naxũ’”, ñanagürũ.

Ñoma i naãnewa nayadexechi i ngẽma duũxũgũ i Tupanaãrũ ixĩgũxũ

14Rü ñuxũchi ichadawenũ rü nüxũ
chadau ga wũxi ga caixanexũ ga
cómũxũ. Rü yema caixanexũẽtũwa
narũto ga Tupana Nane ga duũxũxũ
ixĩcũ. Rü naẽruwa nayexma ga wũxi ga
norũ ngaxcueruũ ga uirunaxcax. Rü
namexwa nayexma ga wũxi ga cũxchi
ga ínapomaguxũ ga tẽxechixũ. 15Rü
Tupanapatawa ínaxũxũ ga wũxi ga to

ga orearü ngeruü ga tagaäcü ñaxü nüxü
ga guma caixanexüétüwa rütociü:

“¡Inaxügü na cunadexü i ngëma
duüxügü i cuxrü ixigüxü! Erü marü
nawa nangu na cugüxütawa cunanaxü,
erü ngëma curü duüxügü i ñoma i
nañewa ngëxmagüxü rü ínamemare na
cunadexü”, ñanagürü. ¹⁶Rü ñuxüchi ga
guma yema caixanexüétüwa rütociü rü
ñoma trigu i buxuxürüü nañeétügu
ngímañ nayabuächi ga norü cüxchi. Rü
nanade ga yema norü duüxügü ga ñoma
ga nañewa yexmagüxü. ¹⁷Rü ñuxüchi
daxüguxü i nañewa ngëxmane ya
Tupanapatawa ínaxüxü ga wüxi ga to
ga orearü ngeruü ga nüxü nayexmacü
ga wüxi ga cüxchi ga ínapomagucü ga
texechixcü. ¹⁸Rü yema pumaraarü
gutexeruütaxmüwa ínaxüxü ga wüxi ga
to ga orearü ngeruü ga üxümañ icuáxü.
Rü nüma rü tagaäcü ñanagürü nüxü ga
yema to ga orearü ngeruü ga yema
cüxchi ga ínapomagucü ga texechixcü
nüxü yexmaxü:

“¡Inaxügü na cunadexü i ngëma
duüxügü i yéa nañewa ngëxmagüxü i
tama Tupanaärü ixigüxü! Erü marü nawa
nangu na Tupana napoxcuexü”, ñanagürü.
¹⁹Rü yema orearü ngeruü rü ñoma ga
nañeétügu ngímañ nayabuächi ga norü
cüxchi. Rü nayadexechi ga yema duüxügü
ga tama Tupanaärü ixigüxü ga ñoma ga
nañewa yexmagüxü. Rü wüxi ga taxü ga
nachicagu nanawocu na yexma Tupana
norü numañ nañaxüçax, ñoma ubagü
imañtütüxürüü. ²⁰Rü yema nachica ga
ñaneärü íxpemawa yexmaxügu nanadai.
Rü guma nagü ga yéma íyaxüchicü, rü 300
ga kilómetru inayarübaichi, rü wüxi ga

metruarü ngäxü nixí ga norü mátama ga
guma nagü.

Tupanaärü orearü ngeruügü ga nüxü nayexmaxü ga 7 ga poxcuruügü

15 ¹Rü ñuxüchi ga daxüguxü ga
nañewa rü nüxü chadau ga wüxi
ga to ga taxü ga cuaxrüü ga namañ
ibaixächixü. Rü nayexma ga 7 ga orearü
ngeruügü ga daxüçüçax ga nüxü
yexmagüxü ga 7 ga poxcuruü. Rü yema
nixí ga Tupanaärü poxcu ga nawa
iyacuáxü ga na nanuxü. ²Rü yexgumarüü
ta nüxü chadau ga ñoma wüxi ga
nanaxtaaétüwaraüxü ga woruariüü
iyauraétüçüxü ga üxüema nawa inachixü.
Rü yéma tayexmagü ga guxema nüxü
rüyexeraxe ga yema ngoxo rü yema
ngoxochicünañxä rü yema ngoxoéga rü
yema númeru ga yema ngoxoéga ixixü. Rü
yema nanaxtaaétüraüxügu tachigü. Rü
tüxü nayexmagü ga tümaärü paxetaruügü
ga arpa ga Tupana tüxna äxü. ³Rü nagu
tawiyaegü ga Moiché ga Tupanaärü duüxü
ixicüarü wiyae. Rü yexgumarüü ta nagu
tawiyaegü ga yema wiyae ga guma
Tupana Nane ga pecaduarü ütanüçax
yucüarü ixixü ga ñaxü:

“Pa Torü Cori ya Tupana ya Guxüärü
Yexera Poracüx, nataxüchi rü
namexëchi i guxüma i ngëma
cuxixü. Rü cuma rü guxügütama
guxüma i nachiüñnegüarü
äñxgacü quixí. Rü cuma rü
aixcüma meäma namañ icucuax
rü taguma quidora. ⁴¿Rü texé
täütama cuxü tamuü, Pa Corix?
¿Rü texé täütama cuxü ticuaxüü?
Erü cuma rü cuxicatama nixí i
üüñecü quiñxü. Rü guxüma i

nachiũñanecũãx rü nuã tá naxĩ, rü tá cuxũ nicuaxũũgũ. Yerü marü nüxũ nadaugü na quixaixcũmaxũ i guxũma i ngẽma nüxũ quixuxũwa rü aixcũma mea cunangugũxũ i guxũma i ngẽma chixexũ ügũxũ rü ngẽma mexũ ügũxũ”,

ñanagürü ga yema wiyae. ⁵Rü yemawena ichadawenü rü nüxũ chadau ga daxũgũxũ ga naãnewa na yawãxnaxũ ga yema nachica ga üünexũ ga Tupanapataarü aixepewa yexmaxũ ga ngexta namaã ínanguxũgũxũwa ga guma nuta ga Tupanaärü mugü nagu ümatüci. ⁶Rü guma Tupanapatawa ínachoxũ ga yema 7 ga orearü ngeruũgũ ga daxũcũãx ga nüxũ nayexmagũxũ ga yema 7 ga poxcuruũgũ. Rü naxchiru ga mexẽchixũmaã rü iyauraciũxũmaã nixãxchiru. Rü yema norü goyeremuũgũ rü uirunaxcax nixĩ. ⁷Rü ñuxũchi wüxi ga yema ágümcü ga daxũcũãx ga maxũxũ, rü wüxichigü ga yema 7 ga orearü ngeruũgüna nanaxã ga wüxi ga taza ga nangaxweraũxũ ga uirunaxcax ga Tupana ya guxũguma maxẽchaciärü nu i äücũmaxũmaã ixãacuxũ. ⁸Rü guma Tupanapata rü namaã naxãacu ga yema caixema ga Tupana ya mexẽchici rü poraciwa ne üxũ. Rü taxucürüwama texé yexma taxücu ñuxmata nagü ga yema 7 ga poxcuruũ ga yema 7 ga orearü ngeruũgüaxũ yexmaxũ.

Tazagü ga Tupanaärü numaa ixãacuxũchiga

16 ¹Rü ñuxũchi nüxũ chaxĩnü ga wüxi ga naga ga tagaãcü guma Tupanapatawa inaxũxũ ga ñaxũ nüxũ ga yema 7 ga orearü ngeruũgũ:

“iNgẽma pexĩ, rü naãneétüwa peyabagüacu i ngẽma 7 i tazagü i Tupanaärü nu i äücũmaxũmaã ixãacuxũ!” ñanagürü. ²Rü yema naxũ ga wüxi ga Tupanaärü orearü ngeruũ, rü naãneétügu nayabaacu ga norü taza. Rü guxũma ga duũxũgü ga yema ngoxoégamaã ixãégaxũ rü yema ngoxochicünaxãxũ icuaxũgũgũxũ, rü nawa inayarügogü ga taixna ga nguxuchixũ ga taguma ixẽxũ. ³Rü yema norü taxre ga orearü ngeruũ, rü taxũ ga taxtũétügu nayabaacu ga norü taza. Rü nagũxũ nananguxuchi ga dexá, rü ñoma wüxi i duũxũ i texé imáxũgürüxũ nixĩ ga dexá. Rü guxũma ga tacü ga taxtũwa maxẽxũ rü nayue. ⁴Rü yema norü tomaẽxpüx ga orearü ngeruũ rü natügüétügu rü natüxacügüétügu nayabaacu ga norü taza. Rü guxũma ga yema natügü rü natüxacügü, rü nagũxũ nanacaxichi. ⁵Rü ñuxũchi nüxũ chaxĩnü ga yema Tupanaärü orearü ngeruũ ga guxũma ga dexámaã icuáxũ ga ñaxũ:

“Pa Torü Cori ya Tupana ya Üüncü ya Woetama Yexmaẽchacü rü Ñuxma Ngẽmaẽchacü, cuma rü wüxi i mexũ cuxü na ngẽmaãcü dexá nagũxũ cunacaxichixẽẽxũ naxchaxwa i ngẽma duũxũgü. ⁶Yerü nümagü rü nanadai ga yema curü duũxũgü rü curü orearü uruũgü, rü inanaba ga nagü. Rü ñuxma i cuma rü wüxi i mexũ nixĩ i cuxũxũ na ngẽma dexá nagũxũ cunacaxichixẽẽxũ na nawa naxaxegũxũcax. Yerü yema nixĩ ga yema nanaxwaxegũxũ rü yemacax nixĩ ga curü duũxũgũxũ naðaixũ”, ñaxũ. ⁷Rü nüxũ chaxĩnü ga wüxi ga naga ga yema pumaraarü gutexeruũtaxmüwa inaxũxũ ga ñaxũ:

“Ngũ, Pa Cori ya Tupana ya Guxũãrũ Yexera Poracũx, aixcũma nixĩ i namexũ i ngẽma cuxũxũ”, ñaxũ. ⁸Rũ yema norũ ãgũmũcũ ga orearũ ngerũ rũ ùãxcũétũgu nayabaãcu ga norũ taza. Rũ yemaãcũ nanaporaxẽẽ ga ùãxcũ na yexeraãcũ nanguxemaxũcax, na yema norũ naĩẽmaxũmaã ínaguãxũcax ga duũxũgũ. ⁹Rũ guxũma ga duũxũgũ rũ poraãcũ nũxũ nanguxema, natũrũ tama nũxũ narũxoe ga nacũma ga chixexũ rũ tama Tupanaxũ nicuãxũũgũ. Rũ naguxchigagũama namaã ga Tupana ya guxũma i ngẽma poxcuruũmaã icuácũ. ¹⁰Rũ yema norũ wũximeẽxpũx ga orearũ ngerũ, rũ yema ngoxoarũ tochicaxũétũgu nayabaãcu ga norũ taza. Rũ guxũwama ga ngextã ãẽxgacũ íyĩxũwa ga yema ngoxo, rũ naxẽãne. Rũ yema na poraãcũ nũxũ nangũxũ ga duũxũgũ, rũ nũgũ nangóõrũ conũãxgũ. ¹¹Natũrũ woo yemaãcũ nũxũ na nangupetũxũ ga duũxũgũ, rũ tama nũxũ narũxoechaũ ga yema chixexũ ga naxũgũxũ. Natũrũ yema na poraãcũ nũxũ nangũxũ ga norũ taixnagũ, rũ naguxchigagũama namaã ga Tupana ya daxũgucũ. ¹²Rũ yema norũ 6 ga orearũ ngerũ, rũ yema taxtũ ga Eufraetẽtũgu nayabaãcu ga norũ taza. Rũ inayache ga yema taxtũ na wũxi ga nama na yĩxũcax naxcax ga yema nachiũãnegũarũ ãẽxgacũgũ ga ùãxcũ íyarũgoxũwa ne ixũ. ¹³Rũ nũxũ chadau rũ yema dragóũãxwa, rũ yema nũxĩraũxũ ga ngoxoãxwa, rũ yema to ga ngoxo ga yema orearũ uruũnetaãxwa, rũ wũxiãxwachigũ ínaxũxũ ga wũxi ga naãẽ ga chixexũ ga ñoma curururũ ixĩxũ. ¹⁴Rũ yema nixĩ ga naãẽgũ ga

yema ngoxogũ ga naxũgũxũ ga yema taxũ ga cuãxruũgũ ga duũxũgũ taxucũrũwa ùgũxũ. Rũ yema ngoxogũ rũ ínachoxũ na nangutaquexẽẽgũãxũcax i guxũma i ñoma i naãnewa ngẽxmagũxũ i nachiũãnegũarũ ãẽxgacũgũ na Tupana ya Guxũãrũ Yexera Poracũmaã nũgũ nadaixũcax i ngẽxguma nawa nanguxgu i naãneãrũ gux. ¹⁵Natũrũ dũcax, rũ pexuãẽgũ erũ tóru Cori ya Ngechuchu ya Cristu rũ ñanagũrũ:

“Choma rũ ngũrũãchi taxúetãma choxũ ínanguxẽẽyane íchangu, ñoma wũxi i ngĩtaxãxũ ínguxũrũũ. Rũ tataãẽ ya yĩxema ímemarexe ñoma wũxi i duũxũ i naxchiru ímexẽẽxũrũũ na tama tangexchiruxũcax rũ taxãnexũcax i ngẽxguma íchanguxgu”, ñanagũrũ. ¹⁶Rũ yema ngoxogũ, rũ nanangutaquexẽẽ ga guxũma ga ñoma ga naãnewa yexmagũxũ ga nachiũãnecũãxgũarũ ãẽxgacũgũ. Rũ yema nachica ga nawa nangutaquexegũxũ, rũ Armaguedóũgu naxãẽga i Yudũgũgawa. ¹⁷Rũ yema norũ 7 ga orearũ ngerũ, rũ buanecũgumare nayabaãcu ga norũ taza. Rũ guma Tupanapata ya daxũguxũ i naãnewa ngẽxmanewa inanaxũ ga wũxi ga naga ga tagaxũ ga yema Tupanaãrũ tochicaxũwa inaxũxũ ga ñaxũ:

“Marũ ñingu”, ñaxũ. ¹⁸Rũ nibaixbexane, rũ poraãcũ nicuxcuane, rũ niduruane. Rũ poraãcũ naxĩãxãchiane. Rũ noxri Tupana duũxũgũxũ ùxgumama rũ taguma nayexma ga wũxi ga ããxãchiane ga yemarũ poraxũ. ¹⁹Rũ guma ããne ga taxũne ga Babiróniã, rũ tomaẽxpũxgu

ningüxyeane. Rü guma ñānegü ga ñoma ga naānewa yexmagüne rü niwaxtaügi. Rü Tupana rü nüxna nacuaxāchi ga guma ñāne ga Babiróniāärü chixexü. Rü yemaçax norü numaā poraäcü nanapoxcu ga guma ñāne, yerü poraäcüxüchi namaā nanu. ²⁰Rü guxüma ga capaxügi rü guxünema ga maxpünegü, rü inayarüxogü. ²¹Rü daxüwa narüyi ga gáuxü ga itapütaxü, rü duüxügüétügu nayi. Rü wüxipütachigü ga yema gáuxü, rü 40 ga kilogu nixi ga nayaxü. Rü ga duüxügü rü Tupanamaā naguxchigagü nagagu ga yema poxcuruü ga gáuxü, yerü poraäcü nüxü nangux ga yema poxcu ga Tupana namaā napoxcuexü.

Ñāne ga Babiróniā ga wüxi ga nge ga ngēāxüchicügu ixuxüne

17 ¹Rü yema 7 ga orearü ngeruügi ga nüxü yexmagüxü ga 7 ga tazagü, rü yematanüwa rü wüxi ga orearü ngeruü, rü chauxçax nixü, rü ñanagürü choxü:

“iNuā naxü! Rü tá cuxü nüxü chadauxēē i tacü tá nixi i ngirü poxcu i ngēma nge i ngeāxüchicü i taxü i dexágüétüwa rütöxcü. ²Rü ñoma i naānewa ngēxmagüxü i nachiüānegüari āēxgacügi, rü ngīmaā namaxē, rü yemaäcü poraäcü chixexü naxügi. Rü guxüma i ñoma i naānecüāx, rü ngirü chixexü nüxna naxüe”, ñanagürü. ³Rü yexguma Tupanaāē i Üünexü yemaäcü choxü ngoxetüxēēgu, rü yema orearü ngeruü rü wüxi ga nachica ga ngextá taxúema íxāpataxüwa choxü naga. Rü yēma ngixü chadau ga wüxi ga nge ga wüxi ga ngoxo ga dauxüétüwa rütöxcü.

Rü yema ngoxo rü guxüwama naxāégaxüne, rü yema naégagü rü Tupanamaā naguxchiga. Rü 7 nixi ga naēru rü 10 ga naxchataçuxre. ⁴Rü yema nge rü wüxi ga naxchiru ga dauxracharaxü rü dauxümaā íxāxchiru. Rü uirumaā rü nutagü ga mexēchicümaā ingāxāē. Rü ngixmexwa ngixü nayexma ga wüxi ga taza ga uirunaxçax. Rü yema taza rü namaā naxāācu ga nagúxüraüxü ga yema Tupanapexewa chixexü rü nagúxüraüxü ga chixexügi ga yema nge üxü. ⁵Rü ngīcatügu naxümatü ga wüxi ga naēga ga taxúema nüxü cuáxü na ñuxü ñaxüchiga yīixü. Rü yema naēga rü ñanagürü:

“Taxüne ya Babiróniā i naē i guxüma i duüxügü i chixexü ügüxü rü guxüma i chixexü i ñoma i naānewa ngēxmaxü”, ñanagürü. ⁶Rü ngixü chadau ga yema nge ga na nangāxüxü namaā ga guma nagü ga yema duüxügü ga Tupanaärü íxügüxü rü yema duüxügü ga Ngechuchuarü orexü na yaxugüxüçax çaixü. Rü yexguma yemaxü chadauxgu, rü chaçaixāchi. ⁷Rü yexguma ga yema orearü ngeruü rü ñanagürü choxü:

“¿Tacüçax çuçaixāchi? Dücax, tá cumaā nüxü chixu na tacüchiga yīixü i ngēma nge, rü tacüchiga yīixü i ngēma ngoxo i 7 eruxü rü 10 chataçuxrexü i naétüwa natoxü. ⁸Rü ngēma ngoxo i nüxü cudauxü, rü yema nixi ga nuxcūmaxüchi maxchiréxü natürü ñuxma rü marü yuxü rü ngēma āxmaxü i taxuguma iyacuáxüwa ngēxmaxü. Natürü paxa tá ngēma íxüxüxü, rü ñuxüchi ngēma nachica i guxügutáma nagu napoxcuxüwa tá üxü. Rü ngēma

ngoxom aã tá nabaixächiãëgü i ngëma duũxügü i ñoma i nañewa maxëxü i tama nawa ngoxégagüxü i ngëma Tupanaärü popera i noxritama nañe ixügügu Tupana nagu yawügüxü i ngëma duũxügü i nüxü nangëxmaxü i maxü i taguma gúxü. Rü nümagü i ngëma duũxügü rü aixcüma tá namaã nabaixächiãëgü i ngëxguma nüxü nadaugügu i ngëma ngoxo ga nuxcümaxüchi maxchirëxü rü yuxü natürü wena táxarü ínguxü. ⁹Rü ñaã nixí i wüxi i ore naxçax i ngëma duũxügü i nüxü natauxchaxü na nüxü nacuxgüxü. Rü ngëma 7 i naëru i ngëma ngoxo, rü yima nixí ya 7 ya maxpúnechiga. Rü yima 7 ya maxpúneétüwa nixí i natoxü i ngëma nge. Rü ngëxgumarüü ta i ngëma naërugü, rü 7 i nachiüãnegüarü ãëxgacügüchiga nixí. ¹⁰Rü wüximeëxpüx i ngëma ãëxgacügü rü marü togü nüxü narüyexeragü, rü ñuxma rü marü tama ãëxgacügü nixígü. Rü ngëma norü 6 i ngëma ãëxgacügü, rü nüma rü ñuxma rü ãëxgacü nixí. Rü ngëma norü 7 tá nixí i yixcüra ínguxü. Natürü ngëxguma ínanguxgu i ngëma norü 7 i nawa iyacuáxü i ngëma ãëxgacügü, rü paxaächimare tá nixí i ãëxgacü yíixü. ¹¹Rü ngëma ngoxo ga nuxcümaxüchi maxchirëxü rü ñuxma rü marü yuxü, rü ngëma nixí i norü 8 i ngëma ãëxgacügü. Rü nüma rü ngëma 7 tanüxü nixí. Natürü i nüma rü ngëma nachica i guxügutáma nagu napoxcuxüwa naxü. ¹²Rü ngëma 10 i naxchatacyxre i nüxü cudauxü, rü 10 i nachiüãnegüarü ãëxgacügüchiga nixí. Natürü i nümagü rü tauta inanaxügüe

na duũxügümaã inacuxgüxü. Natürü yixcüra tá nanayauxgü i pora na wüxítátama i ngora ngëma ngoxomaã wüxigu ãëxgacügü yixígüxüçax. ¹³Rü ngëma 10 i ãëxgacügü rü wüxigu nagu narüxínië na ngëma ngoxona naxägüãxüçax i norü pora, na ngëma ngoxo namaã icuáxüçax. ¹⁴Rü ñuxüchi i ngëma ãëxgacügü rü ngëma ngoxo rü tá nügü nadai namaã ya yima Tupana Nane ga pecaduarü ütänüçax yucü. Natürü ya yima Tupana Nane rü tá nüxü narüyexera, erü nüma rü guxü i corigüarü Cori nixí, rü guxü i nachiüãnegüarü ãëxgacügüarü ãëxgacü nixí. Rü yíxema namücügü ixígüxe, rü yíxemagü tixígü ya Tupana tüxü idexechixe rü tümacax naçaxe. Rü tümagü rü aixcüma naga taxínië”, ñanagürü choxü. ¹⁵Rü yema orearü ngerüü rü ñanagürü ta choxü:

“Ngëma taxü i dexá i nüxü cudauxü i naétüwa natoxü i ngëma nge i ngëãëxüchicü, rü nagúxüraüxü i duũxügüchiga nixí, rü guxüma i duũxügü i to i nagawa idexagüxüchiga nixí, rü guxüma i nachiüãnecüãxgü i duũxügüchiga nixí. ¹⁶Rü ngëma 10 i naxchatacyxre i nüxü cudauxü i nüxü ngëxmaxü i ngëma ngoxo, rü tá ngëma nge i ngëãëxüchicüchi naxaie. Rü tá ngëma ngena nanapuxü i guxüma i tacü i ngíxü ngëxmaxü, rü ngëmaäcü ngexchiruäcüma tá ngëxma irüxãüx. Rü tá ngíxü nangõxgü, rü üxüwa tá ngíxü nigügü. ¹⁷Yerü ga Tupana rü yema 10 ga ãëxgacügüxü nagu narüxíniëxëë na naxügüãxüçax i ngëma nanaxwaxexü i nüma ya Tupana. Rü ngëmacax i ngëma ãëxgacügü, rü tá wüxigu nagu

narüxĩnũe na ngẽma ngoxoxũ
 naporaxẽegũxũ na norũ ãẽxgacũ
 yĩĩxũcax ñuxmatáta Tupana yanguxẽẽ i
 ngẽma nũxũ yaxuxũ. ¹⁸Rũ ngẽma nge i
 ngĩxũ cudaxcũ, rũ yima nixĩ ya yima
 ãane ya taxũne ya guxũma i
 nachĩũãnegũarũ ãẽxgacũgũmaã
 icuáxũne”, ñanagũrũ.

Nagu nayarũchixe ga ãane ga Babirónĩã

18 ¹Rũ yemawena nũxũ chadau ga
 wũxi ga to ga orearũ ngerũ ga
 daxũguxũ ga naãnewa írũxĩxũ ga taxũ
 ga ãẽxgacũ ixĩxũ. Rũ yema orearũ
 ngerũãrũ yauracũũxũmaã nangóone ga
 ñoma ga naãne. ²Rũ tagaãcũ ñanagũrũ:

“Marũ nagu nayarũchixe ya yima ãane
 ya taxũne ya Babirónĩã. Rũ ñuxma rũ
 ngoxogũchiũ nixĩ rũ nagũxũraũxũ i naãẽ
 i chixexũgũchiũ nixĩ. Rũ ñuxma rũ
 ngẽxma naxãchiũ i nagũxũraũxũ i
 ngurucugũ rũ werigũ i chixexũ i
 duũxũgũ naxchi aïexũ. ³Yerũ guxũma
 ga nachĩũãnecũãxgũ, rũ guma ãaneãrũ
 chixexũ nũxna naxũe. Rũ norũ
 ãẽxgacũgũ, rũ yema poraãcũ chixri
 namaxẽ. Rũ guxũma ga ñoma ga
 nachĩũãnecũãxgũ ga taxetanũxũgũ, rũ
 nũgũ namuãrũ dĩerũãxẽegũ namaã ga
 yema ãaneãrũ yemaxũgũ ga tama
 Tupanapexewa mexũ”, ñanagũrũ. ⁴Rũ
 ñuxũchi nũxũ chaxĩnũ ga to ga naga ga
 daxũguxũ ga naãnewa inaxũxũ ga ñaxũ:

“iDũcax i guxãma i pema ya chorĩ
 duũxũgũ ixĩgũxe, rũ ãpechoxũ nawa ya
 yima ãane na tama ngẽma ãanecũãxrũ
 pipecaduãxgũxũcax rũ tama nagu
 peyixũcax i ngẽma poxcu i tá yima
 ãanewa nguxũ! ⁵Erũ ngẽma ãanecũãxãrũ
 pecadugũ, rũ nũgũetũwa narĩnucue, rũ

dũxwa marũ daxũguxũ i naãnewa
 nangu. Rũ ñuxma ya Tupana rũ nũxna
 nacuãxãchi i ngẽma chixexũ i naxũgũxũ,
 rũ ngẽmacax tá yima ãanexũ napoxcu.
⁶Rũ ngẽma poraãcũ chixexũ na
 naxũgũxũrũ, rũ ngẽxgumarũ tá ta
 nixĩ na chixexũmaã nũxũ penaxũtanũxũ
 i pemax. iRũ ñuxma na ngẽma ãanecũãx
 togũmaã chixexũ naxũgũxũ, rũ
 taxrexpũxcũna tá penachixexẽẽ i
 pemax! iRũ ngẽma chixexũ ga yema
 ãanecũãx togũcax mexẽegũxũ, rũ pema
 rũ taxrexpũxcũna tá ngẽmaãcũ naxcax
 penamexẽẽ! ⁷iRũ ngẽma na nũgũ
 yacuãxũũgũxũ rũ mexẽchixũwa na
 namaxẽxũ, rũ ngẽxgumarũ tá ta nixĩ
 na ngũxũ nũxũ pingexẽegũxũ rũ
 ngechaũ nũxũ pingexẽegũxũ! Erũ
 ñuxma i ngẽma ãanecũãx rũ nũgũãewa
 ñanagũrũgũ: ‘Yixema rũ ñoma wũxi i
 ãẽxgacũrũ mexẽchixũwa tangẽxmagũ.
 Rũ tagutãma wũxi i yutexũrũ
 tangechaũgũ’, ñanagũrũgũ nũgũãewa i
 ngẽma ãanecũãx. ⁸Rũ ngẽmacax tá nixĩ i
 wũxitátama i ngunexũgu ñanguxũ i
 ngẽma ãaneãrũ poxcuruũ. Rũ ngẽma
 ãanecũãx rũ ngũanemaã tá nayue, rũ
 poraãcũ tá nangechaũgũ, rũ poraãcũ
 taiya tá nũxũ nangux, rũ norũ ãane rũ
 ùxũmaã tá nigu. Erũ naporaxũchi ya
 yima Tupana ya guxũãrũ Cori ixĩcũ i
 ngẽma ãanexũ poxcucũ”, ñanagũrũ ga
 yema naga. ⁹Rũ ngẽma nachĩũãnegũarũ
 ãẽxgacũgũ ga yema ãanewa poraãcũ
 chixri maxẽxũ rũ mexẽchixũwa
 yexmagũxũ, rũ tá poraãcũ norũ
 ngechaũmaã yima ãanecax naxauxe i
 ngẽxguma nũxũ nadaugũgu i ngẽma
 ùxũema i namaã yaxaxũ. ¹⁰Natũrũ
 ngẽma ãẽxgacũgũ rũ ngẽma poxcuxũ na

namuñëxũchaxwa rü tá yaxũwa nüxũ narüdaunü, rü ñanagürügü tá:

“Cungechaũtümüü, Pa Taxũne ya Iãne ya Babiróniã ya Guxũ i

Nachiũãnegümaã Porachiréne. Erü wüxitama i ngoragu cuxçax ínangu i curü poxcu”, ñanagürügü tá. ¹¹Rü guxũma i ñoma i naãnecũãx i taxetanüxũ, rü tá poraãcü norü ngechaũmaã naxçax naxauxe ya yima iãne. Erü marü taxúetáma naxçax nüxũ tataxe i norü ngẽmaxũgü i ngẽma nangegüxũ. ¹²Rü marü taxúetáma naxçax nüxũ tataxe i norü uiru, rü norü dïerümü, rü norü nutagü i mexëchixũ, rü naxpügü i mexëchixũ i dauxracharaxũ rü idauxcharaũ i ngẽma nangegüxũ. Rü ngëxgumarüü ta taxúetáma naxçax nüxũ tataxe i nagúxũraũxũ i norü naïxchipanügü i yixixũ, rü norü ngẽmaxũgü i marfílnaxçax rü mürapewa i mexëchixũnaxçax rü cobrenaxçax rü fierunaxçax rü nutanaxçax i ngẽma nangegüxũ. ¹³Rü taxúetáma naxçax nüxũ tataxe i norü canela rü togü i norü üexũwemüxũgü i yixixũ, rü pumaratexe i guruü ixixũ, rü togü i pumaragü i yixixũ, rü binügü rü chixũgü, rü arina i mexëchixũ, rü trigu i ngẽma nangegüxũ. Rü ngëxgumarüü ta ngẽma nanagagü i wocagü, rü carnerügü, rü cowarügü, rü autügü i cowaru ítúchigüxũ, rü duũxũgü i puracüruũgü. Rü ngẽmaãcü woo duũxëgü rü ngẽma tüxũ nagagü na tũmamaã nataxegüxũçax. ¹⁴Rü ngẽma taxetanüxũ, rü ñanagürügü tá nüxũ ya yima iãne:

“Cuwa rü marü nataxuma i ngẽma orix i curü duũxũgüarü me ixixũ. Rü

marü nataxuma i guxũma i ngẽma meruũgü ga noxri cuxũ yexmaxũ, rü tagutáma wenaxãrü cuxũ nangëxma”, ñanagürügü tá. ¹⁵Rü ngẽma taxetanüxũ i guxũma i ngẽma orixgümaã rü ngẽma meruũgümaã taxegüxũ rü guma iãnegu nügü muãrü dïeruãxëxũchigüxũ, rü yaxũwa tátama nüxũ narüdaunü ya yima iãne, erü nüxũ namuñë i ngẽma poxcu i yima iãnexũ üpetüxũ. Rü tá poraãcü norü ngechaũmaã naxauxe. ¹⁶Rü ñanagürügü tá:

“Nangechaũtümüü ya yima iãne ya taxũne. Erü noxri rü ñoma wüxi i nge i mexëchixũ i naxchiru i dauxracharaxũ rü dauxcharaxũmaã äxchirucü i uirumaã rü nutagü ya mexëchicümaã ngaxãëxcürüü nixĩ. ¹⁷Natürü ngürüãchi nagux i guxũma i ngẽma iãneãrü meruũgü”, ñanagürügü tá. Rü guxũne ya wapurugüarü äëxgacügü, rü guxũma i norü duũxũgü ya yima wapuruwa puracüxũ, rü guxũma i duũxũgü ya yima wapurugu ixũ, rü guxũma i taxetanüxũgü i wapurugu yarüxũtũxũ, rü yaxũwa tátama nayachaxgütanüãchi, rü ngẽma tá nüxũ narüdaunü. ¹⁸Rü ngëxguma nüxũ nadaugügu i norü caxixũ ya yima üxü ya yima iãne namaã ixaxũne, rü tagaãcü tá ñanagürügü:

“Nataxuma ya nái ya iãne ya daa iãne ya taxũnerüü ixixũne”, ñanagürügü.

¹⁹Rü norü ngechaũmaã nügüétügu tá waixũmü nagünagügü, rü tá poraãcü naxauxe, rü tagaãcü ñanagürügü tá:

“Nangechaũtümüü ya yima iãne ya taxũne. Rü noxri rü norü yemaxũgümaã nügü nimuãrü dïeruãxëëgü ga guxũne ga wapurugüarü yoragü. Natürü i ñuxma rü ngürüãchi wüxi i

ngoragutama rü inayarüxo i guxüma i ngëma. ²⁰Natürü ñuxma na napoxcuxü ya yima ñäne, rü name nixi i petaäëgü i pema i daxüguxü i naänewa ngëxmagüe, rü pema i Tupana pexü imugüe, rü pema i Tupanaärü orexü ixugüe, rü guxäma i pema i Tupanaärü duüxügü ixigüe. Erü ñuxma na napoxcuxü ya yima ñäne, rü ngëmaäcü Tupana pexü naxütanü naxçax ga yema chixexü ga pemaä naxügüxü ga guma ñäneçüäx”, ñanagürügü. ²¹Rü ñuxüchi wüxi ga Tupanaärü orearü ngerüü ga daxüçüäx rü nanangenagü ga wüxi ga nuta ga taxüchicü ga ñoma täciarü caruürüü ixicü. Rü yema orearü ngerüü rü taxtü ga taxügu nanaña ga guma nuta ga taxüchicü, rü ñanagürü:

“Ngëxgumarüü tá quixi na icuyarüxoxü Pa ñäne ya taxüne ya Babiróniä na tagutäma texé wena cuxü nadauxü. ²²Rü tagutäma wena curü cayewa texé nüxü taxüü i paxetaruügü i arpagü rü quenagü rü cornetagi. Rü ngëxgumarüü ta cuwa nataxutäma i puracütanüxügü i täciwa puracüexü, rü tagutäma texé nüxü taxüü na cuwa ínapuracüexü i chawüarü caruügü. ²³Rü marü tagutäma texé nüxü tadau i cuwa i omü. Rü marü tagutäma texé nüxü taxüü i ngigüchigaarü petagiari cuxcuane. Rü ngëmaäcü tá cumaä nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüarü yexera nixigü. Rü ngëmacax tá poraäcü cupoxcu nagagu ga yema chixexü ga namaä cunawomüxëexü ga guxüma ga togü ga nachüñäneçüäx ga duüxügü”, ñanagürü. ²⁴Yerü guma ñäneçüäx ga

duüxügü nixi ga naäixü rü inabaxëëgüxü ga nagü ga Tupanaärü orearü uruügü rü yema duüxügü ga Tupanaärü ixigüxü rü guxüma ga duüxügü ga ñoma ga naänegu Tupanaarü oregagu naäixü.

19 ¹Rü yemawena nüxü chaxüü ga muxüma ga duüxügüga ga daxügüxü ga naänewa tagaäcü ñagüxü:

“iNgixä Tupanaxü ticuaxüügü! Erü nüma nixi i tüxü namaxëxëxü. Rü nüma ya törü Tupana nixi i guxüarü yexera namexëchixü rü naporaxüchixü.

²Rü nüma rü aixcüma meäma nanangugü i guxüma i duüxügüarü maxü, rü aixcüma tá nanapoxcxe i ngëma chixexü ügüxü. Rü ngëmacax marü nanapoxcu ya yima ñäne ya taxüne ya chixene ya norü chixexümaä nachixexëéne i guxüma i ñoma i naänecüäx i duüxügü. Rü ñuxma i nüma ya Tupana rü norü duüxügü ga guma ñäneçüäx daixüxü naxütanü”, ñanagürügü. ³Rü ñuxüchi wenaxärü ñanagürügü:

“iNgixä Tupanaxü ticuaxüügü! Erü yima üxüarü caxixü ya yima ñäne namaä ixaxüne, rü tagutäma inayarüxo”, ñanagürügü. ⁴Rü yema 24 ga äëxgacügü rü yema ägümücü ga daxüçüäx ga maxëxü rü yexma nanangücuchitanü, rü Tupana ya yema tochicaxüwa rütocüxü nicuaxüügü. Rü ñanagürügü:

“Rü ngëmaäcü yii. iRü ngixä nüxü ticuaxüügü ya törü Cori!” ñanagürügü.

⁵Rü ñuxüchi yema tochicaxüxütawa inanaxü ga wüxi ga naga ga ñaxü:

“Name nixi i törü Tupanaxü picuaxüügü i guxäma i pemax Pa

Buxügü rü Pa Yaxügüx i norü duüxügü na pixigüxü rü nüxü na pemuüëxü”, ñaxü.

Tupana Nane ga pecaduarü ütanüçax yucüarü ngügüarü petachiga

⁶Rü ñuxüchi nüxü chaxínü ga tacü ga ñoma muxüchixü ga duüxügü idexagüxüüü ixixü ga ñoma taxü i cotüna i chuxchuxüüü ixixü ga ñoma poraäcü yaduranexüüü ixixü ga ñaxü:

“iNgixä Tupanaxü ticuaxüüü! Erü nüma ya tórü Cori ya Tupana ya guxüärü yexera poracü, rü marü ningucuchi na guxümaä inacuaxü. ⁷iRü ngixä tataäëgü rü guxü i tórü taäëmaä nüxü ticuaxüüü! Erü marü nawa nangu na iyangixü ya yima Tupana Nane ga pecaduarü ütanüçax yucü. Rü ngëma norü duüxügü i ñoma namaxrüü ixigüxü rü marü nügü ínimexëëgü. ⁸Rü yima Tupana Nane rü ngëma nüxü yaxögüxüü namu na mexëchixü rü cómuxü rü iyauracüüxü i naxchirumaä na yaxächiruxü. Rü ngëma naxchiru i mexëchixü rü ngëma nixi i ngëma duüxügüarü maxü i mexüchiga”, ñanagürü. ⁹Rü ñuxüchi ga Tupanaärü orearü ngerüü, rü ñanagürü choxü:

“Chanaxwaxe i cunaxümatü i ñaä ore i cumaä tá nüxü chixuxü: ‘Tataäëgü ya yíxema tüxna naxuxe i norü ngügüarü petawa ya yima Tupana Nane ga pecaduarü ütanüçax yucü’”, ñanagürü. Rü ñuxüchi ñanagürü ta:

“Ngëma ore i cumaä nüxü chixuxü, rü Tupanaärü orexüchitama nixi”, ñanagürü. ¹⁰Rü choma rü yema orearü ngerüüpexegu chacaxápüxü na nüxü chicuaxüüüçax. Natürü ga nüma rü ñanagürü choxü:

“iTáxü i ngëma cuxüxü! Erü choma rü ta Tupanaärü duüxü chixi, ngëxgumarüü i cuma rü cueneëgü i Ngechuchuarü ore i aixcüma ixixü ixögüechaxüüü ta chixi. Rü name nixi i Tupanaxü quicuaxüü”, ñanagürü. Erü ngëma ore i Ngechuchuchiga ixixü, rü yematama ore nixi ga Tupanaärü orearü uruügü nüxü ixugüexü ga yexguma Tupanaäë i Üünexü nawa ideaxgu.

Guma Tupana Nane ga cowaru ga cómuxüétügu tonagücüchiga

¹¹Rü ñuxüchi nüxü chadau ga daxüguxü ga naäne na yawāxnaxü. Rü yéma nangox ga wüxi ga cowaru ga cómuxü. Rü guma naétüwa rütocü rü Ixaixcümacü rü Aixcüma Yanguxëëcü nixi i naéga. Rü nüma rü aixcüma guxüma i duüxügüarü maxüxü nacuax, rü aixcüma tá guxüma i ngëma chixexü ügüxümaä nügü nadai rü tá nanapoxcue. ¹²Rü naxëtügü, rü ñoma üxüemarüü niyauracüü. Rü naëruwa rü namu ga norü ngaxcuerüü. Rü nacatügu naxümatü ga wüxi ga naéga ga nüxícatama nüxü nacuaxü. ¹³Rü wüxi ga naxchiru ga máxü ga nagüwa táexü nixi ga naxchiru. Rü naéga rü Tupanaärü Ore nixi. ¹⁴Rü nawe narüxi ga guxüma ga norü churaragü ga daxüçüäx. Rü nümagü rü naxchiru ga imexëchixü rü cómuxümaä nixächiru. Rü cowarugü ga ícómuxüétügu naxi. ¹⁵Rü naäxwa nayexma ga wüxi ga tara ga tēxexixü na yemamaä napíxexëäxüçax i guxüma i ngëma duüxügü i tama nüxü yaxögüxü. Rü tá nüma nanaxwaxexüäcüma ngëma duüxügümaä inacuax. Rü nüma rü tá

poraãcü ngëma duũxũgü i tama
yaxõgũxũxũ napoxcu namaã i ngëma
poxcu ya Tupana ya Guxũxũ
Rüporamaëcü norü numaã mexëëxũ. Rü
ñoma ubagü i norü maĩxruũwa
imaĩxtüũxũrũ tá nixĩ na napoxcueãxũ.
¹⁶Rü naxchirugu rü naperemagu
naxümatü ga wüxi ga naéga ga ñaxũ:

“Guxũma i nachiũãnegüarü
ãëxgacügüarü ãëxgacü, rü guxũma i
corigüarü Cori ixĩcü”, ñaxũ. ¹⁷⁻¹⁸Rü
ñuxũchi nüxũ chadau ga wüxi ga
Tupanaärü orearü ngeruũ ga daxũcüãx
ga üaxcügu chixũ. Rü nũma rü tagaãcü
ñanagürü nüxũ ga guxũma ga
ngurucugü ga yexma ixexexũtanũxũ:

“iNuã pexĩ rü pengutaquexegü naxcax
i õna i taxũ i Tupana pexcax mexëëxũ
na penangõxũcax i nachiũãnegüarü
ãëxgacügümachi, rü churaragüarü
ãëxgacügümachi, rü yatügü i
poraxũchixũmachi, rü cowarugümachi,
rü ngëma cowaruétügu íxũ i
duũxũgümachi, rü ngëma duũxũgü i
coriãxgũxũmachi rü ngëma ngearü
coriãxgũxũmachi rü ngëma
buxũgümachi rü ngëma yaxũgümachi!”
ñanagürü. ¹⁹Rü ñuxũchi nüxũ chadau
ga yema nüxĩraũxũ ga ngoxo rü guxũma
ga nachiũãnegüarü ãëxgacügü ga norü
churaragümaã yëma ngutaquëxegũxũ
na nügü naðaixũcax namaã ya yima
cowaruétügu íxũcü rü norü churaragü.
²⁰Rü yema nüxĩraũxũ ga ngoxo rü
niyaxu. Rü wüxigu namaã niyaxu ga
yema to ga ngoxo ga orearü uruũneta
ixĩxũ ga yema nüxĩraũxũ ga
ngoxopëxewa naxũxũ ga cuaxruũgü ga
duũxũgü tama nüxũ cuãxũ na
naxügũãxũ. Rü yema cuaxruũgümaã

nixĩ ga nawomüxëëãxũ ga yema
duũxũgü ga nüxũ icuaxũüügũxũ ga
naxchicũnaãxã ga yema nüxĩraũxũ ga
ngoxo rü nügü ixãgũxũ na yema
ngoxoégamaã na yaxüëgagũxũ. Rü
yema nüxĩraũxũ ga ngoxo rü yema to ga
ngoxo ga orearü uruũneta ixĩxũ, rü
wüxigu maxëxũma nawa nawoũ ya
yima naxtaa ya üxũmaã iyaurachiüne
ya azufremaã ixaxüne. ²¹Rü yema tara
ga tẽxexichũ ga guma cowaruétüwa
rütocüãxwa yexmaxũmaã nanadai ga
yema ngoxogüarü ngũxëëruũgü ga
ãëxgacügü rü norü churaragü. Rü
guxũma ga ngurucugü, rü
yemamachimaã nangãxcharaũgü.

Chataná rü 1,000 ga taunecü ninaĩx

20 ¹Rü yemawena nüxũ chadau ga
wüxi ga Tupanaärü orearü
ngeruũ ga daxũgũxũ ga naãnewa
írxĩxũ. Rü naxmëxwa nayexma ga
yema ãxmaxũ i taxuguma iyacuáxũärü
chawĩ rü ñuxũchi wüxi ga cadena. ²Rü
yema Tupanaärü orearü ngeruũ rü
yema dragóũxũ niyaxu. Rü yematama
dragóũ nixĩ ga yema nuxcũmaũxũ ga
ãxtape ga ngoxo ga Chataná ixĩxũ. Rü
yema orearü ngeruũ rü 1,000 ga
taunecügüçax nayanãĩx. ³Rü yema
orearü ngeruũ rü yema ãxmaxũ i
taxuguma iyacuáxũgu nayataxcuchi. Rü
ñuxũchi yexma meãma nanawãxtaũ na
nũma ga Chataná rü marü taguma
wenaxärü duũxũgũxũ nawomüxëëxũcax
ñuxmatáta 1,000 ya taunecü ngëxma
yangeã. Rü ngëxguma marü
yanguxëëãgu ya yima 1,000 ya taunecü,
rü tá paxaxãchi nayangex. ⁴Rü ñuxũchi
nüxũ chadau ga ñuxre ga tochicaxũgü.

Rü yema tochicaxüwa tarütogü ga guxema Tupanaxütawa nayauxgüxe ga pora na duüxügüxü ticagüxüçax. Rü yexgumarüü ta nüxü chadau ga naäëgü ga yema duüxügü ga Ngechuchuarü orexü na yaxugüxüçax nadaünaägüxü. Rü yema nixi ga duüxügü ga meäma nüxü ixugüxü ga Tupanaärü ore rü tama yema ngoxoxü icuaxüügüxü rü bai ga yema ngoxochicünaçaxü icuaxüügüxü, rü tama nügü ixägüxü na nacatuwa rü exna naxmexwa yema ngoxoégamaä yaxäëgaxü. Rü nüxü chadau ga wena na namaxëxü, rü 1,000 ga taunecü Cristumaä wüxigu äëxgacü nixigü. ⁵Rü yemagü nixi ga nüxïrama írüdagüxü. Natürü ga yema togü ga yuexü rü täütáma namaxë ñuxmatáta yima 1,000 ya taunecüguwena. ⁶Rü tataäëgü ya yíxema tüxira írüdagüxe erü Tupanaärü duüxügü tixigü. Rü ngëma Tupanaärü poxcu rü marü täütáma tümacax nixi. Rü tá Tupanaärü rü Cristuarü ngüxëëruügü tixigü. Rü 1,000 ya taunecü tá Cristumaä äëxgacügü tixigü.

**Ngoxo i Chataná rü marü nagu
nayarüchixe**

⁷Rü ngëxguma marü nangupetügu ya yima 1,000 ya taunecü, rü Chataná rü tá ningex i ngëma ínapoxcuxüwa. ⁸Rü nüma i Chataná rü tá ínaxüxü na yawomüxëëxüçax i guxüma i ñoma i naänecüçax i duüxügü rü Goga rü Magoga na ngëmagüxü nangutaquexexëxüçax na Tupanaärü duüxügümaä nügü naäixüçax. Rü ngëma Chatanáärü churaragü, rü ñoma taxtü i taxüärü naxnecüchicutexerüü tá namuxüchi. ⁹Rü ngëmaäcü i Chatanáärü

churaragü rü tá ñoma i naäneärü tagu ninguuchi. Rü tá Tupanaärü duüxügüxü rü yima ñane ya Tupana nüxü ngechaxüne ya Yerucharéüxü ínachoeguächí. Natürü Tupana rü daxüwa tá nanayixëë ya üxü, rü yimamaä tá nixae i guxüma i ngëma norü uwanügü. ¹⁰Rü ngëma ngoxo i ngëma duüxügüxü womüxëëxü, rü nawa tá natáe ya yima naxtaa ya üxümaä iyaurachiüne ya azufremaä ixaxüne. Rü yima nixi ya naxtaa ga marü nawa nawoüne ga yema nüxïraüxü ga ngoxo rü yema to ga ngoxo ga orearü uruüneta ixixü. Rü yima naxtaawa tá nixi i guxügutáma ngunecü rü chütacü ngúxü yangegüxü.

**Ngëma taxü i tochicaxü i cómuxüwa
rütocüpexewa nangugü i duüxügü**

¹¹Rü ñuxüchi nüxü chadau ga wüxi ga taxü ga tochicaxü ga cómuxü, rü nüxü chadau ga guma nawa rütocü. Rü gumachaxwa nibuxmü ga ñoma ga naäne rü guxüma ga daxüwa nüxü idauxü, rü inayarütauxe. ¹²Rü nüxü chadau ga yema yuexü ga yaexü rü buexü ga Tupanapexegu chigüxü. Rü ningena ga poperagü. Rü yexgumarüü ta ningena ga yema Tupanaärü popera i nagu yawügüxü i ngëma duüxügü i nüxü nangëxmaxü i maxü i taguma gúxü. Rü yema yuexü rü yexgumarüü ga ñuxäcü na namaxëxü ga wüxichigü rü yexgumarüü ga ñuxäcü na yema poperawa inaxümatüxüüäcüma Tupana namaä nüxü nixu na ngextá tá naxixü. ¹³Rü yema yuexü ga taxtü ga taxüwa yexmagüxü rü wenaxäri ínarüdagü. Rü yema yuexü ga tauquewa

yexmagüxü rü wenaxärü inarüdagü. Rü yemaäcü inarüdagü ga guxüma ga duüxügü ga yuexü. Rü guxüma ga yema yuexü rü Tupana nüxna nicachigü rü yexgumarüü ga ñuxäcü na namaxëxü ga wüxichigü rü namaä nüxü nixu na ngextá tá naxixü. ¹⁴Rü yemawena rü guma naxtaa ga üxümaä iyaurchiünewa nawoü ga yu guxüma ga norü poramaä. Rü guma naxtaa ga üxümaä iyaurchiüne, rü ngëma nixí i poxcu i taguma iyacuáxü i tûmacax ixixü ya yíxema tama Tupanaärü duüxügü ixigüxe. ¹⁵Rü guma naxtaa ga üxümaä iyaurchiünewa tawoü ga guxema ingeégaxe nawa i ngëma Tupanaärü popera i nagu tiwügüxü ya yíxema tüxü nangëmaxë i maxü i taguma gúxü.

Ngexwacaxüü i ñoma i naäne rü guxüma i daxüwa ngëmaxü

21 ¹Rü yemawena nüxü chadau na nayexwacaxüü ga ñoma ga naäne rü guxüma ga tacü ga daxüwa yexmagüxü. Yerü yema nüxíra yexmagüxü rü marü nangupetü, rü yema taxü ga taxtü rü marü nataxuma. ²Rü nüxü chadau ga guma ñäne ga mexüne ga Yerucharëü ga yexwacaxüne ga daxügüxü ga naänewa Tupanaxütawa íruxixüne ga guxüwama mexëchine ñoma wüxi i pacü i ngëxguma iyangixgu rü ngíteçax ngigü mexëxcürüü ixixüne. ³Rü nüxü chaxínü ga wüxi ga naga ga yema tochicaxüwa inaxüxü ga tagaäcü ñaxü:

“Tupana rü duüxügütanüwa namaxü i ñuxmax. Rü natanüwa tá namaxëcha. Rü nümagü rü norü duüxügü tá nixigü.

Rü nüma ya Tupana rü natanüwa tá nangëxmaëcha, na guxüguma norü Tupana yiixüçax. ⁴Rü nüma tá inanapi i naxgüüëtü i guxüma i ngëma duüxügü. Rü marü täütáma texé tayu, rü texé tûmaärü ngechaümaä taxaxu, rü texé ngúxü tingegü. Erü guxüma i ngëma ngúxü rü marü inayarüxo”, ñanagürü. ⁵Rü guma yema tochicaxüwa rütocü rü ñanagürü:

“Düçax, choma rü chanangexwacaxüxëë i guxüma i tacü i ngëmaxü”, ñanagürü. Rü ñuxüchi ñanagürü ta:

“iNaxümatü i ñaä ore! Erü ñaä ore rü aixcüma nixí, rü ñaä nixí i ore i mexü na yaxöxü”, ñanagürü. ⁶Rü yemawena rü ñanagürü choxü:

“Ñuxma rü marü ningu i guxüma. Rü chowa nixí ga inaxügüxü ga guxüma, rü nataxuma i tacü i chorü yexera ngëxmaëchaxü. Rü yíxema itawaxe, rü choma rü tá nangetanüäcüma tüxü chaxaxëëmære nawa i ngëma dexá i maxëëruü. ⁷Rü yíxema nüxü rüporamaëgüxe i chixexü, rü tá tanayauxgü i guxüma i ngëma mexügü i nüxü chixuxü. Rü choma rü tá tûmaärü Tupana chixí, rü tûma i chauxacigü. ⁸Natürü ngëma muüëxü i nüxü rüxoexü na chowe naxixü, rü nawa tá nawoü ya yima naxtaa ga üxümaä iyaurchiüne ya azufremaä ixaxüne. Rü ngëxgumarüü ta i ngëma tama yaxögüxü, rü ngëma chixexü ügüxü, rü ngëma máëtagüxü, rü ngëma naí i ngëmaä ipexü, rü ngëma iyuüxü rü ngóxwaxegüxü, rü ngëma tupanetachicünaxäxü icuaxüügüxü, rü ngëma idorataxgüxü, rü nawa tá nawoü ya yima naxtaa ga üxümaä

iyaurachiüne ya azufremaã ixaxũne. Rü ngẽma nixĩ i poxcu i taguma iyacuáxũ i nüxũ ínanguxẽẽxũ i ngẽma tama yaxõgüäcũma yuexũ”, ñanagürü.

Yexwacaxũne ga Yerucharéũchiga

⁹Rü yema 7 ga orearü ngeruũgü ga nüxũ yexmagüxũ ga 7 ga tazagü ga yema 7 ga poxcuruũmaã ixãäcuxũ, rü yematanüwa rü wüxi ga orearü ngeruũ rü chauxcax nixũ, rü ñanagürü choxũ:

“iNuã naxũ! Rü tá cuxũ nüxũ chadauxẽe i ngẽma yaxõgüxũ i ñoma namaxrüũ tá ixĩgüxũ ya yima Tupana Nane ga pecaduarü ütanüçax yucü”, ñanagürü. ¹⁰Rü yexguma yemaäcü Tupanaãe i Üünexũ choxũ ngoxetüxẽẽgu, rü yema orearü ngeruũ rü wüxi ga maxpũne ga taxũnewa choxũ naga. Rü choxũ nüxũ nadauxẽe ga guma ñane ya üünene ga Yerucharéũ ga daxügüxũ ga naãnewa Tupanaxũtawá íruxixũne. ¹¹Rü guma ñane rü Tupanaärü yauracüxũmaã nangóone. Rü yema norü yauracüxũ ga guma ñane rü ñoma wüxi ya nuta ya mexëchicürüũ nixĩ. Rü ñoma nuta ya yasperüũ nixĩ na yachipetüxũ. ¹²Rü guma ñane rü guxüwama ínapoxegu. Rü nataxüchi rü namáchanexüchi ga yema norü poxeguxũ. Rü yema norü poxeguxũ rü nüxũ nayexma ga 12 ga norü íax. Rü wüxichigü ga yema íaxwa nayexma ga wüxi ga Tupanaärü orearü ngeruũ. Rü wüxichigü ga yema íaxwa nangoxéga ga wüxichigü ga yema 12 ga Acobu nane ga Yudíugü nawa ne íxũ. ¹³Rü tomaẽxpüx ga norü íax rü napexewaama nayexma, rü yema to ga tomaẽxpüx rü norü toxwecüwawa

mayexma, rü yema to ga tomaẽxpüx rü norü tügüñecüwawa nayexma, rü yema to ga tomaẽxpüx rü naweama nayexma. ¹⁴Rü guma ñaneärü poxeguxũ, rü 12 ga nuta ga taxüchicüetüwa ínaxügü. Rü wüxichigü ga guma nutagüwa nangoxéga ga wüxichigü ga norü ngüexüğü ga guma Tupana Nane ga pecaduarü ütanüçax yucü. ¹⁵Rü yema orearü ngeruũ ga chomaã idexaxũ, rü nüxũ nayexma ga wüxi ga norü ngugüxũ ga uirumenaxãanaxcax na yemamaã nangugüäxüçax ga guma ñane, rü norü íaxgü, rü norü poxeguxüğü. ¹⁶Rü guma ñane rü nawüxigumare ga guxücüwawa. Rü norü max rü nawüxigumare namaã ga norü tatachinü. Rü yema orearü ngeruũ rü yema uirumenaxãmaã nanangugü ga guma ñane. Rü 2,200 kilómetru nixĩ ga norü max. Rü yexgumarüũ ta 2,200 kilómetru nixĩ ga norü tatachinü. Rü 2,200 kilómetru ta nixĩ ga norü máchane. ¹⁷Rü yemawena rü inanangu ga yema norü poxeguxũ ga guma ñane. Rü 65 metru nixĩ ga norü máchane. Rü yemaäcü düxüğüarü ngugüxũmaã nanangugü. ¹⁸Rü yema norü poxeguxũ ga guma ñane, rü nuta ga mexëchicü ga yaspénaxcax nixĩ. Rü nümatama ga guma ñane rü uirunaxcax nixĩ. Rü ñoma woruarüũ niyauracüü. ¹⁹Rü guma nutagü ga itacü ga norü poxeguxüpara ixĩgücü, rü nagüxüraücü ga nuta ga ímexëchicümaã nangaxãe. Rü guma nüxüraücü ga napara rü nuta ga yaspemaã nangaxãe. Rü guma norü taxre ga napara rü nuta ga safirumaã nangaxãe. Rü guma norü tomaẽxpüx ga napara rü nuta ga ágatamaã nangaxãe.

Rü guma norü ägümücü ga napara rü nuta ga esmerádamaã nangaxãê. ²⁰Rü guma norü wüximeëxpüx ga napara rü nuta ga onichemaã nangaxãê. Rü guma norü 6 ga napara rü nuta ga cornalínamaã nangaxãê. Rü guma norü 7 ga napara rü nuta ga crisólitumaã nangaxãê. Rü guma norü 8 ga napara rü nuta ga berilumaã nangaxãê. Rü guma norü 9 ga napara rü nuta ga topásiumaã nangaxãê. Rü guma norü 10 ga napara rü nuta ga crisoprásamaã nangaxãê. Rü guma norü 11 ga napara rü nuta ga yachítumaã nangaxãê. Rü guma norü 12 ga napara rü nuta ga amatístamaã nangaxãê. ²¹Rü yema 12 ga norü iãx ga guma iãneärü poxeguxü rü perlanaxçax nixĩ. Rü wüxichigü ga yema iãx rü wüxitama ga perla nixĩ. Rü yema norü caye ga guma iãneärü ngäxüwa dapetüxü, rü uiruxicanaxçax nixĩ. Rü ñoma woruarüü niyauracüü. ²²Rü guma iãnewa rü taxúnema ga ngutaquexepataxü ga ngextá Tupanaxü nawa yacuaxüügünexü chadau, yerü nümatama ga Tupana ya poracü rü Nane ga pecaduarü ütanüçax yucü rü yéma nayexma na duüxügü nüxü icuaxüügüxüçax. ²³Rü yima iãne rü taxuçaxma üaxcü rü tauemacü nüxü nabaxi, erü Tupanaärü ngóonexütama nixĩ i nangóonexëëxü. Rü yima Tupana Nane ga pecaduarü ütanüçax yucü nixĩ ya norü omü ixícü. ²⁴Rü ngëma Tupanaärü ngóonexü i yima iãnexü ngóonexëëxü tá nixĩ i nangóonexëëxü naxçax i guxüma i ñoma i naãneçüãx i duüxügü. Rü ngëma tá nangugü i guxüma i nachiüãnegüarü äëxgacügü i yaxögüxü rü tá Tupanana nayana i norü

mexügü. ²⁵Rü norü iãxgü rü tagutáma narüwãxtagü erü ngëma rü guxüguma nangune rü taguma nachüta. ²⁶Rü ngëma tá nanana i guxüma i ñoma i naãneärü mexügü. ²⁷Natürü tagutáma ngëxma naxücu i çacü i Tupanapexewa chixexü, rü bai ya texé ya chixexü úxe rü çxna idorataxáxe. Rü yíxema Tupana Nane ga pecaduarü ütanüçax yucüarü poperawa ngoxégagüxexicatátama tixigü ya ngëxma chocuxe.

22 ¹Rü ñuxüchi ga yema orearü ngerüü rü choxü nüxü nadauxëê ga wüxi ga natü ga metacüchiüxü rü ichipetüchiüxü ga dexá ga maxëëruü. Rü yema tochicaxü ga nawa natogüxü ga Tupana rü Nane ga pecaduarü ütanüçax yucü, rü nawa nixĩ ga ne nadaxü ga yema natü. ²Rü guma iãneärü ngäxüwa dapetüxü ga cayearü ngäxügu nida ga yema natü. Rü norü guxücutüwa narüxügü ga naigü ga maxëëruü. Rü yema naigü rü wüxicanatama naxo ga wüxichigü ga tauemacügu rü yemaacü 12 expüxcüna naxo ga wüxi ga taunecügu. Rü naätügü ga yema naigü, rü guxü i nachiüãneçüãx i duüxügü i yaxögüxüärü taãëxëëruü nixĩ. ³Rü ngëma rü nataxutáma i çacü i Tupana chixexü namaã naxuxuchixü. Rü yima iãnewa tá nangëxma i norü tochicaxü ya Tupana rü Nane ga pecaduarü ütanüçax yucü. Rü norü duüxügü rü tá nüxü nicuaxüügü. ⁴Rü ngëma norü duüxügü rü tá nachiwexüchixü nadaugü, rü tá naégamaã nixäëgacatü. ⁵Rü ngëma rü tagutáma nachüta. Rü ngëma norü duüxügü, rü taxuçaxtáma nanaxwaxe i daparina rü çxna üaxcü na

nangóonexũcax. Erü nümatama ya tórü Cori ya Tupana rü tá nüxũ nabaxi. Rü nümagü i ngẽma duũxũgü rü guxũgutáma wũxigu Tupanamaã âëxgacügü nixĩgüecha.

Marü ningaica na wena núma naxũxũ ya Ngechuchu ya Cristu

⁶Rü ñuxũchi ga yema Tupanaãrũ orearü ngeruũ rü ñanagürü choxũ:

“Ñaa ore rü aixcũma ixĩxũ nixĩ, rü ñaa nixĩ i ore i mexũ na yaxõxũ. Rü nüma ya tórü Cori ya Tupana ga nuxcũma norü orearü uruũgũmaã nüxũ ixucü ga tacü tá na ngupetũxũ, rü nümatama nixĩ i ñuxma inamuãxũ i norü orearü ngeruũ i daxũcũgax na norü duũxũgũxũ nüxũ nadauxẽxũcax na tacü tá paxa nangupetũxũ”, ñanagürü. ⁷Rü nüma ya tórü Cori ya Ngechuchu rü ñanagürü:

“Paxa tá íchangu. Rü tataãe ya yíxema naga ñnuxẽ i ngẽma Tupanaãrũ ore i ñaa poperagu ümatũxũ”, ñanagürü. ⁸Rü chomatama i Cuãũ rü nüxũ chaxĩnũ rü nüxũ chadau i guxũma i ngẽma nüxũ chixuxũ. Rü yemaxũ chaxĩnũguwena rü nüxũ chadauxguwena, rü yema orearü ngeruũ ga yemaxũ choxũ dauxẽxũpexegu chacaxápũxũ na nüxũ chicuaxũũxũcax. ⁹Natürü ga nüma rü ñanagürü choxũ:

“¡Táxũ i ngẽma cuxũxũ! Erü choma rü ta Tupanaãrũ duũxũ chixĩ, ngẽxgumarũ i cuma rü cueneëgü i Tupanaãrũ orexũ ixugũxũ rü ngẽma duũxũgü i naga ñnũxũ i ngẽma ore i ñaa poperagu ümatũxũ. Rü name nixĩ i Tupanaxũ quicuaxũ”, ñanagürü. ¹⁰Rü ñanagürü ta choxũ:

“Tama name na icuyacũxũ i ngẽma Tupanaãrũ ore i ñaa poperagu ümatũxũ,

erü marü ningaica na yanguxũ i ngẽma ore. ¹¹Natürü ngẽma chixexũ ügũxũ, rü chixexũ tá naxũgüecha. Rü ngẽma Tupanapexewa chixri maxẽxũ, rü chixri tá namaxẽecha. Natürü yíxema mexũ ügũxe, rü name nixĩ na mexũ taxũgüechaxũ. Rü yíxema Tupanapexewa ixüünexẽ, rü name nixĩ na Tupanapexewa tixüüneẽchaxũ”, ñanagürü. ¹²Rü ñanagürü ga Ngechuchu:

“Dũcax, paxa tá íchangu namaã i ngẽma ãmare i wũxichigũna tá chaxãxũ ngẽxgumarũ na ñuxacü tanaxũxũ i tümax. ¹³Choma nixĩ i norü ügü i guxũma, rü chowa nixĩ i yacuãxũ erü nataxuma i tacü i choweama üxũ. ¹⁴Rü tataãëgü ya guxãma ya yíxema yima pecaduarü ütanũcax yucüguwa tũgü iyauxgũchiruxe na Tupanapexewa timexũcax na yima ñãneãrũ ñãxwa tichocuxũcax rü nüxũ tangõxnetagũxũcax i ngẽma norü o i ngẽma naĩ i maxẽëruũ. ¹⁵Natürü tãütãma yima ñãnewa nichocu i ngẽma tama yaxõgũxũ, rü ngẽma iyüũxũ rü ngõxwaxegũxũ, rü ngẽma naĩ i ngemaã ipegũxũ, rü ngẽma máëtagũxũ, rü ngẽma tupanetanetachicũnaxãxũ icuaxũũgũxũ. Rü ngẽxgumarũ ta i ngẽma idorataaxgũxũ i norü me ixĩxũ na togũxũ nawomũxẽëgũxũ, rü tãütãma nawa nichocu ya yima ñãne. ¹⁶Rü choma i Ngechuchu, rü guxãma i pema i yaxõgũxũtanũwa chanamu i chorü orearü ngeruũ na pemaã nüxũ yaxuxũcax i guxũma i ngẽma chorü ore. Rü choma nixĩ i Dabítaa chiĩxũ. Rü choma nixĩ ya yima woramacuri ya paxmama poraãcũ nangóonexẽëcürũ

chiĩxũ”, ñanagürü. ¹⁷Rü Tupanaãẽ i Üünexũ rü guxũma i yaxõgũxũ, rü Ngechuchuxũ ñanagürügü:

“iNuã naxũ!” ñanagürügü. Rü yíxema nüxũ ñnũxẽ i ñaã ore, rü:

“iNuã naxũ!” ñatagügü. Rü yíxema itawáxe rü tüxũ nachixégaxe, rü name nixĩ i nuã taxũ rü tüxũ nangetanüäcuma nawa taxaxe i ngẽma dexá i maxẽẽruũ. ¹⁸Rü guxãma ya yíxema irüxĩnũẽxẽ i ñaã Tupanaãrũ ore i ñaã poperagu ümatüxũ, rü tũmamaã nüxũ chixu rü ngẽxguma chi texé íyatóxẽẽgu i ngẽma Tupanaãrũ ore i ñaã poperagu ümatüxũ, rü Tupana rü tá tũmacax nanayexeraxẽẽ i ngẽma poxcuruũgü i ñaã poperawa nachiga naxümatüxũ. ¹⁹Rü ngẽxguma chi texé

nüxũ üpetügu i wüxitama i ñaã Tupanaãrũ ore i ñaã poperagu ümatüxũ, rü Tupana rü tãütáma tüxũ nüxũ nangoxnetaxẽẽ i ngẽma norü o i ngẽma naĩ i maxẽẽruũ i ñaã poperawa nachiga naxümatüxũ. Rü ngẽxgumarüũ tá ta tãütáma tüxũ nimucuchi nawa ya yima ñãne ya üünene i ñaã poperawa nachiga naxümatüne. ²⁰Rü yima nüxũ ixucü i ñaã ore, rü ñanagürü:

“Ngẽmáãcü, paxa tá íchangu”, ñanagürü. Rü ngẽmaãcü yĩ. Rü choma i Cuáũ rü ñacharügü:

“iNuã naxũ Pa Cori ya Ngechuchu!” ñacharügü. ²¹Rü chanaxwaxe i tórü Cori ya Ngechuchu ya Cristu poraãcü pexũ narüngũxẽẽ i guxãma i pemax. Rü ngẽmaãcü yĩ.